


石倉世纂

放言居詩集

第二册





文香居詩集

余之與海上曹君巢南交也垂三十年而未常一識其面始者先識君之兄莆田君茹菴因以知君家兄弟爲二難已而識君之姪貢士諤廷後乃與君之子中舍敬三相款洽而始與君有書疏往還通問酬答之好余之未應詔而入都也敬三數將父命以元趙文敏倪高士兩家之詩文集精加校勘將梓行世而請序於余余固心許之而未暇作也迨入都匏繫而遂蹉跎矣然其心未嘗不指申江滬瀆之間有與古爲徒之人焉如君者其文與行皆脩潔而無瑕疵非余之所眷而不忘者耶及余歸而與君後先有悼亾之戚各以不越疆之年

而遣使相弔唁則其迹雖疎其情彌親矣君又作為曹氏族譜而屬之序言余又以知君之篤於睦族而設為規條以訓行於族之人且使其冠昏喪祭之貧無告者皆有所依賴而君之自家庭以型於邦邑者亦有所感發而興矣君於時年已六十餘士大夫之言東南耆舊者莫不推之跡君之為人亦非徒高標潔已以巖棲谷隱自樂者少壯時銳志場屋思出其經綸以利濟斯人而不偶于時堙鬱其志中年以往則卧疴之日多故不得已而樂志田園教子成名以抒其所蘊又隨其力之所至多行善事於鄉里蓋觀君之得為者而其不得為

者可推而知矣至其慕用古人汲汲為遺詩文廣其傳不惜傾家貲以刊布之者甚眾又非徒趙文敏倪高士兩家已也推君之意良欲以其所好者公諸人而深恐俗學之汨没人耳君之自作有放言居集而近者至手錄其古今體數十百篇以示余字畫清雄展卷即為改觀讀其詞蕭然高寄有塵外之致皆自出新意而靜吟其所得者寫物之工尤出於形影意象之表不肯以隻字涉於流俗人之所經道而亦非區區摹擬唐宋諸賢僅步其後塵者蓋君之集出而自成一家言惟以其精華之不朽者與古並而已余與君雖未謀一面而自謂

能知君之心者以視夫貌相厚而神不屬可同日語哉
雖然君在海上去予鄉居止一舍可以朝發而夕至行
見吾二老之把臂歡然相與語古而推今唱予和汝之
樂必將傾倒其生平且盡發君詩而觀之不知其賞會
更何如也今姑以此序君詩

雍正甲辰夏五月嘉定同學弟樸村張雲章書

給諫曹濟寰先生天資穎異淹貫古今奏疏詩文名震
朝野余自閩奉檄赴江蘇暫駐海上得先生詩集讀之
古高雅潔一破逆旅岑寂惜先生棄世十有四年不獲
親聆謦欬而晤其賢嗣錫端菽衣出示時文詩詞皆空
羣之作繼晤菽衣從弟錫黼菽衣圍騷雅與菽衣頡頏固
其賦性超邁而詣力精進尤於紹承家學得之蓋尊人
則中舍淞濱先生令祖則文學巢南先生也竊自羈居
踰月遇此邦紳耆士林父老擔夫諮訪舊德莫不嘖嘖
稱巢南先生厚道仁風於族黨於姻舊於朋僚於比閭
鄉隣並煦以春溫沐以膏澤道之津津不置菽圃適以

先生所刻趙松雪倪高士諸集見貽并先生自著放言居詩集屬余為序余竊觀今之豐於財與富於才者矣大抵斤斤然屑屑然錙銖德色視身以外窘困孤寒從不以寘於懷於古今人文詞翰墨落落寞寞聽其零落散逸於敗笥廢簾間曾不一顧况肯出其心思精力發揮於磨丹漬墨之餘者有幾哉又况不惜厚貲付剞劂以流布海內使其人名與文並傳者更有幾哉即如吳興趙文敏松雪全集吾浙從未及重梓先生與文敏生不同時居不同里代為刊刻流傳若是蓋先生渾厚深沉之德如太和元氣流行四時於人則解衣推食於古

則微顯闡幽宜其發為詩歌純乎古詩人和平忠厚之氣如放言居詩集是已讀其詞蕭疎高曠隨意抒寫不規規於摹倣唐人而自得乎言志永言之旨既梓行世矣且先生學極該博古文辭積稿盈篋文孫菽圃克世其業而表著之鐫梨鋟棗之工無虛日春三月余公竣旋閩申江劔浦二千里而遙矣余將索巢南先生全集而讀之并給諫中舍二先生文集而讀之并菽衣菽圃累日近作如風發泉湧者而一一讀之余之願也庶不辜今日海上之一遊涉也是為序

乾隆己巳春王月蕭山後學望瞿來謙鳴書於上海關

部舊署

近世之言詩者宗唐宗宋互有異同或又以為善學唐者惟宋入主出奴牴牾排擊而未有已然揆諸古人言志永言之旨則詩以道性情一咏一吟皆以宣其天懷之感發與在中之底蘊故讀其書可以想見其人而拘拘於時代無庸也余年伯巢翁先生獨行君子也迹其培植宗支心力俱殫推而至於知交鄉黨沾潤無算生平監立皆為人所不能為而又深自韜晦不以市名古人清畏人知無以加焉惟擁書萬卷日與知己商榷古今考論德業是其天性之真藹如學力之邃淵如義理之味時浸淫於骨髓間是惟無作作則皆真性之流行

邃學之呈露也真性之流其氣必和邃學之露其音必雅當夫中有所得矢口成章或友朋聚會往復酬答其渾厚有合於唐而要非誇張聲貌以為唐其清雋有類於宋而要非借巧俚俗以為宋則以有君形者存乎其故其詩獨為先生之詩而非規撫形似如人人之詩也先生世居上洋距余家百里而遠賢阮賓川與余為同譜兄弟癸丑計偕京邸過從具悉先生梗概心嚮往之廼南旋未幾而先生已呼臯復矣憶賓川聚語時每以不得親炙為憾今讀其遺詩優柔平中清醇淵雅而先生之風範宛在楮墨間或謂詩以人重非詩之借重

於人詩如其人人重詩亦重也余於先生居猶子之列何敢序先生之詩顧文孫旦雯請益力不獲辭則以其根於人品學問者著先生之詩之所以貴俾世之讀是詩者知聲韻之學本乎性情而務植其根柢則詩教之興亦於是而益上也

乾隆戊辰一陽月年眷姪沈湖拜手書

昔歐陽子論作詩謂必窮者而後工後人駁之以爲古
來詩人不必盡窮窮者亦未必盡能詩此固達者之論
然人情當抑鬱無聊之時無嗜好以亂其心而且以
動忍其心性則天真易於流露而處順適之境者未免
爲紛華靡曼之所溺苟非具傑出之資者鮮能超然於
世味之外而以其性情之樂託諸歌詠之間然則窮而
後工之說蓋亦未嘗無當也巢南曹子簪纓世胄也生
而席豐履厚不知世有窮愁庸人處此蓋亦易於溺沒
者巢南獨能於世所羣好競趨濡首而不知返者一切
吐棄而獨喜爲詩夫如是即其詩不甚工亦已足多矣

而又能苦心深造以求及於古所謂具傑出之資者非耶巢南詩清真簡淡其氣味與陶淵明王摩詰孟襄陽韋蘇州諸家爲近頗厭夫貌爲盛唐而無真性情者喜讀宋名家詩其所沈酣寢食者尤在眉山蘇氏嘗手錄其所得意者置案間披詠不輟余嘗謂巢南東坡之詩似不及其文之光燄巢南曰其光燄自在言外求之字句之間則失之矣予慊然自愧其識之淺而言之躁而知巢南之所造未易測也壬午冬以其所作放言居詩示余屬以評隲點次余見其詩經賓門張先生批閱其所欣賞與余相合者八九因不敢復肆雌黃而附贅數

語於其端冀因詩以垂不朽焉讀竟忽念巢南之詩若是其多且佳而余曾不得一二可以求正於人者不覺喟然自歎而笑歐陽子之言果非通論也鹿城弟鮑歷拜手叙

上海縣志獨行傳

曹炳曾字爲章篤於至行三黨之貧乏者每厚給之爲族姪兩娶婦婦卒又撫其嬰故人三喪未舉助之舉有名家子淪落爲人鄙解衣推食三十年歿更歛之捐貲育嬰夏月施帷帳晚年創置義田以贍族聚書萬卷吟嘯其中輯族譜著放言居集孫錫黼梓以傳

蘇其神意於家效言或素於時

昔與夏氏結華聯如平險思德

後亦于命幾歸入福繼

蘇其神意於家效言或素於時

昔與夏氏結華聯如平險思德

後亦于命幾歸入福繼

放言居詩集目錄

卷一

五言古二十五首

七言古二十三首

卷二

五言律八十一首

卷三

七言律七十四首

卷四

七言律七十七首

卷五

五言絕句二十首

七言絕句七十五首

卷六

雜著二十四首 附

卷二

目錄畢

放言居詩集卷一

孫壻葉承子敬

海上曹炳曾巢南著 姪 傑士電發同較

孫男 錫黼誕文

五言古

滄浪亭

向聞滄浪勝迢遙數程隔今來一見之愛此前賢跡綠
水繞悠悠畫橋橫寂寂但見魚鳥歡時聞空翠滴登亭
讀舊題千古名留壁人生如寄耳我今欲何適
月下醉題水亭

方書居言集卷一
小園結茅宇留月到閒亭綠樹印蒼苔淡雲吐微星斷
續兩部蛙參差數點螢捲簾清夜坐不辨影與形書生
徒碌碌辛苦老一經所以稽阮輩終日醉不醒我復何
為者舉杯肯暫停

贈張含雅

張子真小隱居如南阮貧菜圃煙霞淡竹扉風雨頻一
飯烹葵藿時呼中聖人瀟灑出塵外高眠六十春新詩
屢唱和媿我乏清真平生洽素志結茅願卜鄰

苦雨

梅雨滴不歇空階夜到明日月埋輝光陰雲四面橫簾

幃蒸氣白砌草帶愁生樵子行不還螻蛄藏不鳴憑闌
多慘澹鞭石望新晴

贈琴客

羨君善鼓琴願君洗我心七絃勗直道品貴徽黃金玄
鶴鳴九臯飛龍出洞吟既覺高山邈又知流水深廣陵
久矣絕何處得遺音

有所思

我從堤上過綠樹暗藏鶯不見叢花發惟聽賣花聲日
月往復來浮雲自送迎相識難相遇空懸無限情

邀含雅夜飲

我非不能飲病來暫止酒爾是飲中人酌以一大斗招
呼明月前代我作酒友淵明花一籬謫仙詩百首黃雞
催曉曲兀坐蒼髯叟醉後覺耳熱仰天空拊缶

九月五日閒園觀菊以菊花須插滿頭歸為韻分

得插字

爽氣一何佳籬花相浹洽可愛不可名清光落我恰簾
外葉聲乾林中鳥道接清水涵芙蓉飄香穩睡鴨坐久
夜逾澄輕寒酒力壓自顧鬢已頽花枝羞共插

春暮

春光九十暮景物足娛情落紅滿院飛無人花氣清碧

窗睡未足恰恰啼嬌鶯種松白石間風拂有虛聲追陪
寡唱和與世不爭名搔首頂憐禿逢人眼怯明會須早
行樂無嗟華髮生

喜雨

頑雲翻墨汁閃電奪人目颯然涼風至獵獵響窗竹朝
來枕畔聲雨珠跳高屋不惟草木榮田疇滋五穀

曉起

曉窗滅燈影疎松漏曙色但覺耳目清俯仰悠然適緩
步書卷隨閒中若有得輕風池上來微雨山間息一片
艷陽天春光濃欲滴誰伴予微吟鶯語柳絲織

同里諸子詩

瞿筠冲

瞿子性冲澹平生疎生計巖棲七十年潛身樂避世談
禪斷諸想能叅卧輪偈詩句老清新起振時流弊清風
引杖屨明月牽衣袂熱鬧傀儡場優游聊卒歲

張含雅

張老何坦率園無芋與粟混跡寄閒身自料無六術窮
廬庇風雨蕭然吟抱膝雅興托清尊花月歸詩律王翰
願卜鄰過談時捫蝨不見問如何醉卧復幾日

顧環瀛

直道豈宜俗傷哉顧子貧性介雖少合忘形最相親有
時花前醉鬱抱偶一伸四筵驚謾罵吐氣不顧身屈指
牛角交嗟君獨漂淪澆愁便耳熱昂首問蒼旻

沈侶白

瑚璉廊廟器檜柏棟梁姿自幼聞軒翥至今尚樊籬豈
曰有天命恬淡志不移煙雲吞墨汁波濤驅文詞世路
孰愛才與子幸同時無那傷伯道呼天一問之

張學山

我本草野狂伴君卧滄海開襟吐逸唱臨池想丰采英
流慕高誼刮目以相待時從輕舟遊吟聲出欸乃常與

木石居鳥啼花蓓蕾不附青雲志悠悠五十載

鮑思遠

塵路誰知心敦槃徒役役晚歲得明遠一見契幽獨夜
月揚鴻詞秋風對修竹五載寄西江左蠡豁遠目游歷
悟世紛詹尹不須卜諷詠囊中詩騷壇手盡縮

張侶臣

寄跡甘窮巷與世無逆億性獨惡脂韋晤對如鬱阨蕭
疎抱微尚汗漫脫形迹蒼苔空閉門作伴惟琴奕花月
惜佳晨有時移輕屐撫節一高歌歌罷四天碧

陸原亨

若翁我舊交窮經甘皓首一從赴玉樓我失左右手念
子負竒才源流有授受大雅久淪喪鴻藻肯落後逸志
避風塵著書垂不朽仰望歎良材匠石空反走

春夜南園玩月醉歸

暮靄入春林飛鳥歸翕翼流光四面開坐嘯山寂寂招
邀月在天萬象倏以闕池空清見底貯月深莫測舉杯
照形影相對不相識繞徑雲有情拂面風無力小犬不
吠人自向籬間息

冬日金星槎過訪

落葉滿階除抱病掩關卧忽聞叩門聲喜我故人過廿

方音月言集卷一
五
載寄相思相思情無邨羨子雲山遊笑我園蔬課古道
照蒼顏談言珠玉唾袖裏出新篇陽春自寡和可使泣
鬼神曾讀萬卷破已矣綴一辭恐令詩腸澆

春暮見飛絮有感

春風三月暮百卉弄晴暉柳絮何悠揚隨風入簾幃寂
寞庭院閑無人自相依燕語白晝長交惜春將違留春
不我應落紅點竹扉有往必復來人生識何微不如海
上翁忘機鷗不飛

秋暑困人聞春浦弟齋中熱不可耐賦東一章

吾聞淵美齋久已人事絕松院響其聲品泉聽啼鴉奈
何節序秋困人暑猶熱爾苦既不堪我懷向誰說惜無
綠筠軒紛紛落窗雪

喜晴

連旬春雨積晝夜打簷楹尋春無伴侶愁對煙冥冥曉
來清夢醒忽覺紙窗明呼童問如何幸覩天宇清頑雲
歸遠岫樹頭挂銅鉦滿園淑氣催屋角斑鳩鳴披衣聊
起坐百草爭向榮東風拂面來幽香解宿醒

對鏡有感

舊日盤龍鏡棄置久埃塵開匣重拂拭清光耀星辰衰
老不可避驚歎二毛新天地一逆旅日月如奔輪以空

方音居言集卷一
觀色相俱作鏡中人俄頃忽不見誰爲金石身俯仰三
歎息感額多嘖呻

七言古

送玉峰高元友重遊山左

高子平生作篆稱最工匹馬慷慨山之東得游聖門知
道大更登泰岱覺勢雄乍見涼颺江上起尊鱸追憶故
園裏別如昨日倏二年相逢話舊春風前况值梅花開
似雪歡言胡復傷離別攜手石梁潮乍平柳枝欲折愁
腸結愁腸結春正芳花飛野店馬蹄忙山迴路轉人何
處千疊萬疊雲茫茫

閨怨

深閨少婦年十六驚看雙燕雕梁宿玉指閒拋織錦聲
卷簾拜月焚香祝羣拖六幅石榴紅緩步空房眉黛蹙
窺鏡不言淚暗垂無限含情知爲誰

游華山寺

山徑縈迴多鬱纒忽聞人語空谷出春禽歡呼游屐來
白雲暗度西歸日古松倒挂似虬龍千株萬株積翠濃
怪石橫斜安所從我亦來尋古寺蹤勝地支公卓錫處
壁立千丈出奇峰推窗仰望心驚惕參差竹樹連雲黑
禪關隔市常寂寥中有幽人自閒適

哀王生

王生名誥字丹衷隣家子也與兒輩同筆硯年
少質美人目以大器戊寅夏偶染微疾竟赴玉
樓會哭者咸賦詩以傷之

哀哉王生真玉樹丰姿瀟灑推獨步行年未滿二十春
彼蒼何遽奪其數不覺掩袖淚縱橫溘焉神已如朝露
朝露猶有復落時九泉何處覓歸路憶昔常聽呬唔聲
癡兒同舍挹餘清南浦泛舟春雨歇西樓對月秋風生
未幾攜囊去我廬一別不見二年餘但聞古木巢禽合
時歎空庭好客疎汝師張子我良友來往時為說起居
一旦寂寞夜臺月回首青燈竟何如哀哉王生長已矣
美才摧折堪欷歔

中秋夜對月

明月未出秋雲橫良宵堪惜感慨生四境絃歌聲黯慘
默持桂醕坐愁城颯然風起亂雲捲遂令光耀天之晴
冷照世間歡怨處我心湛然同爾明仰望星斗依稀見
銀河倒挂如匹練虛庭頓覺青松寒烏鵲驚飛疾如電

病中送家羽九之顛署

北風凜冽寒鴉飛黃葉渡口行人稀江水滔滔渺無極
送君西去何時歸繞路驚風冷刮面暮景蕭條孤棹倦

惶恐灘中石似牙章貢江頭水如箭六年奔走徒爾為
雁聲呼侶心眷戀憐子多病雪雰雰心灰面瘦何所欣
半生拙謀空白首無術何能強致君親朋若問行藏在
敢道富貴如浮雲

題畫卷

風淅淅雨淒淒山耶雲耶壓樹低鳥飛猿攀不可見惟
有古松獨立如仙梯釣艇隨波去棹歌煙霧迷行人策
笠蒼崖外石橋流水失雲溪董叔達曹雲西點綴毫末
誰與齊世間復覩此佳卷山中故人招我飲酒謾留題

寒食雨中

去年寒食桃李花南村北村眺望賒今年寒食苦陰溼
梅花零落黏窗紗一春心事嫌寂寞尋芳何地語笑譁
我生寓物如草露東齋起坐橫朝霧烏啼鵲噪喬木昏
震雷閃電瀟瀟雨稍待泥乾訪蘭若花邊拄杖看浴鷺

惜花吟

桃之天天花灼灼含笑春風尋舊約疎疎密密影參差
縹緗間雜滿城郭花間置酒發清香玉顏半酡破嫩萼
當榮猶喜護花鈴此日飄零竟何託惜芳常怪笛聲悲
剪綵徒資隋苑喙已經淫雨漸凋殘更堪捲地東風虐

寒月

我聞征鴻啞啞號霜天齒牙戰鬥寒透綿呼童撥爐煮
白酒冰輪湧出海雲邊此時仰望邈何極褰衣踏影不
遑眠霜嚴人靜夜茫茫虛堂簷馬鳴丁當着耳淒清發
哀響持杯獨坐吸素光村酒雖薄須盡醉莫待月落牽
詩腸停杯對月三歎息願得同爾皎如霜祇恐一夜西
風惡頓教黑霧漫穹蒼

憶梅

郊外二里許高人康子予事庭有古梅一株枝
幹蟠曲最為奇古花發時觀者雲集余患足疾
連歲不能往探今春小園梅亦報花對景興懷

遙想其盛

繁霜凜凜獨占魁年年開時待春回不用羯鼓臨軒擊
東風夜嘯白雲堆隔簾曉景清光逼一幅素練巧剪裁
况聞城南的皜開離離素影點莓苔更憶蟠枝斜穿屋
暗香漠漠拂面來晴窗燕坐光景好高人吟咏真悠哉
我不見花我自惜花不見我花應猜昨夜夢斷羅浮月
美人何處生餘哀

同友人郊外尋春小憇西林精舍

春風澹蕩萌芽生春林好鳥間關鳴陌頭殘梅飛數點
矇矓倦眼瞥分明荒郊尋春杳無跡一池綠水鳧拍拍

方音居言集卷一
修林窈窕開士居映帶斜陽流雲白粉壁留題仰面看
何人學杜得皮骨有僧問訊來何地怪客無端倉卒至
羨師方外冰雪清蓮社尋盟不我棄

搗鼓篇

余少好漁陽之技及得簡兮陸君之傳方悟其
緩急疾徐抑揚頓挫小收大結參差變化之法
苟非酒後氣壯胸襟浩落不能盡其妙也甲申
元夕客有以搗鼓請者余頻來多病不發此興
久矣勉強應之并爲作搗鼓篇

當年妙手推彌衡漁陽搗獨擅名魏武謫爲掌鼓吏

岑牟單絞眉眼橫余雖才畧非生比酒酣觸撥動豪情
始作抑揚發清響雍雍鴻雁相和鳴山林蕭疎木葉脫
時聞樵斧遠丁丁縱之劃然變軒昂勇士拔劍斫敵營
倏爾四境雲霧合電雹交下雷車轟喜怒哀怨炎於中
一日奮迅發不平弱者頓使心膽壯勇者起立慷慨生
請君憑欄傾耳聽淵淵便有金石聲今夕何夕月如晝
清光四耀稀列宿潦倒年華志已頽多病多愁稜骨瘦
我性山野年將邁羣賢側目俱挺秀彌生氣節足千古
鸚鵡賦猶懸宇宙無才馳驟翰墨場漁陽一技追隨後
苦雨得新茶餉虞山周拜菴

方山詩集卷一
十一
斜風習習帶雨腥鳴鳩逐婦墮空庭苔深綠暗殘花舞
清溝石澗水泠泠幽居閉門無過轍枯坐焚香惟守拙
閒烹雀舌與揀芽吟餘一盞詫清絕百餅分餉故人前
勿效蜀客薑鹽煎我生於物無所好嗜茶却類玉川顛
况逢雨深疑漏天傾盆翻甕湧如泉知君窮旅不自釋
潑墨吟詩愁素箋何時過調大小絃烹茶話雨兩歡然
一洗胸中俗累牽

龍挂行

黑雲崢嶸漫蒼穹驚風刮地拔巨松簷前白晝暗如漆
雷聲隆隆雷閃紅忽然龍挂村樹東江翻浦立怒聲雄
白雨跳珠響瓦屋冰雹雜拉絕行踪疲農遠望手加顙
我今飽眠樂歲豐老龍甲坼尾流血旱魃雖虐術已窮
悄坐片時雲雨散乾坤一洗萬象空

草書歌

長夏閒居意縱橫欲書不書無限情烏皮几陳三五冊
展轉披閱興自生自從當年二妙死筆法掃地有誰爭
俯仰四顧宇宙闊尺幅却詫龍蛇驚拊掌叫跳狂墮幘
恍如斗酒破愁城一時洗濯胸中惡煙雲入懷波濤作
蠅頭小楷何足論擘窠書追衛與索提筆興酣如飲癡
頓足睜目有所思吳牋蜀素不稱意却與高軒粉壁宜

送拜菴歸虞山

壁上懸君一幅圖對此消憂百事無我思品格如君者
高峰突兀月平鋪空林颯聽西風厲別我匆匆歸海虞
留連知無益惆悵只須臾尊羹一杯酒風帆六幅蒲君
別去一燈孤讀書不負吾學書豈作奴敢謂舉世不足
法我輩要令氣味殊送君去漫踟躕風月當前不用沽
山中有鳥提壺盧知己相思不相見共此秋光天一隅
臨風爲寄相思句伊唔展玩聊歡娛

萬沛亭從陽羨來見訪喜賦

送別清秋秋乍涼桂花齧屐歸故鄉西風蕭條黃葉渡
指點寒鴉不知數閉戶獨坐還獨吟疑義相析誰知音
況逢黃菊東籬徧擘牋把酒君不見罨畫溪邊月欲迷
任公臺前江欲低羨爾登高挹風景盪胸拂拭塵與泥
今朝握手沾沾喜得聆佳况神遊矣老我倦遊兩鬢華
光陰暗度悠悠裏

立秋後一日坐雨

昨夜西風條已秋夢中驚雨打簷頭晨起披襟快幽賞
清溝活活水爭流呼童烹茶解病渴園菓肥綻供採掇
我愛新秋早晚涼綵牋縱筆煩襟豁吟秋吮墨思迢遙
濕雲漫漫風蕭蕭頽然東海一老翁白雪盈顛髀日消

坐聽疎響長廊雨碎滴芭蕉黯無語

天馬歌贈電發姪

汝不見魏家將軍千里駒風蹄電影爭先驅有時叱變
風雲色豈識人間有險途又不見龍媒未得籟青雲俛
首鹽車凡馬羣天驥凌風自騰躍當世豈復少伯樂一
朝得志向天閑玉勒金韉何照灼馳驟長衢窮八垠追
風逐日不起塵此際下視三萬匹駑駘喘息何足云更
不見老驥伏櫪肆骨骼志存千里終鬱阨自甘垂耳脫
絀羈譬如玄黃誰鞭策天馬出兮榮光聚超西極兮依
漢主執鞭按圖徒紛紜醉作狂歌兮聊贈汝

醉宜亭看梅有懷舊友

東風昨夜南枝開滿園春色爲誰來老眼模糊如霧裏
孤懷何自掃塵埃憶昔登樓正好春梅花如雪照幽人
觴詠流連成往事只今對景空傷神虎頭僧繇已大覺
我雖夢中自犖犖笛聲哀怨隨風飛花殘莫似人生促
花前舊交今已空有酒賞花誰與同一年第一番花信
百端交感白髮翁入春以來多陰雨飡飯不知日亭午
俯仰宇宙轉淒涼閒把花鬢隨意數

二月十日燕至

暮春天氣白晝長燕燕差池繞畫梁今年仲春尚霜霰

放言居詩集卷一
衝寒早與病翁見感時愁坐興索然燕識主人猶眷戀
楊柳初放黃金芽營巢羣鳥啼啞啞淨掃莓苔花徑滑
梅花開罷蘭又茁主人坐擁敝裘看樓邊細語苦春寒
王謝門庭今已窅托身慎莫栖林杪頡頏飛去却飛來
助我詩腸休擾擾

待月吟

東望瑤臺天鏡飛光風吹影拂春衣姮娥杳渺不可問
朗吟謝賦情依依開尊獨酌誰唱和一樹梨花香繞座
我不負花肯負月祇見花影隨月卧昨夜夢醒陡生愁
打窗風雨驚颼颼今宵澄澈青雲端矯首倍覺恣清歡
停盃問月花含笑笑我頭白何癡頑君不見境有悲歡
人老少中天明月無私照

放言居詩集卷一

放言居詩集卷二

海上曹炳曾巢南著

孫壻葉

承子敬同較

姪孫

錫寶鴻書

孫男

錫黼誕文

五言律

偕諸同人冒雨尋桃次陸簡兮韻

城西荒僻處桃徑自成林恐負看花約偏為冒雨尋樹
深宜有寺地曠恨無岑聊助羣公興韶華不繫心

對月

四顧浮雲盡空懸白玉盤光侵孤榻靜影浸一樓寒樹

老花垂護苔深露結團
啣杯須盡興莫道夜將闌

懷友

獨處多岑寂韶光又一年
煙霞吾輩領事業幾人傳
玩世宜如此逃名豈偶然
有懷同皓月散步小溪邊

渡江望金陵

擊汰浮揚子茫茫天塹迴
一山空檜柏雙闕半蒿萊
佳氣秋原失悲笳夜雨來
舊京形勝地憑弔有餘哀

題知止上人禪房

遠公習禪處寂寂一廬深入戶
孤塔秀窺窗衆木陰雨花
知佛境啼鳥息塵心坐久聞
空籟悠然度竹林

何處堪逃暑四首

乙亥夏三伏蒸人流金爍石揮汗成
雨旣乏鄭灼鎮心之瓜復缺謝公引風之扇
避炎何地遣興無方含雅以何處堪逃暑
爲首句限韻索賦

漫成四章

何處堪逃暑水亭好納涼
松杉高落影荷芰暗生香
夢斷眠多穩詩成興轉長
偶然一矯首蟬噪送斜陽
何處堪逃暑幽篁翠葉新
任教逢赤日藉以庇閒身
鮮碧窗留潤清陰徑絕塵
有風堪醒酒杯學好相親
何處堪逃暑桐陰向晚清
披襟明月上散髮好風生
恍

若秋臨院還疑響扣瓊微涼生玉井談笑任縱橫
何處堪逃暑空山澗水流曉風吹釣線殘月照歸舟得
失心無着功名病且休林泉有素志何必慕鳴騶

螢火

艸腐始生螢流光亦自熒點苔疑宿火度水亂飛星天
子朝傳詔儒生夜勘經不堪風雨至歎爾獨飄零

絡緯

絡緯何為者哀聲動隔林那堪明月夜來作斷腸音懶
婦驚心起癡兒篝火尋秋風正蕭颯獨立歎浮沉

中元對月有懷繼初弟

時序驚頻改長空夜色新寒蟬方咽露皓月正隨人泛
泛蘇公棹依依張翰尊天涯遊子意歸計莫逡巡

秋郊獨步四首

獨步孤城外郊原爽氣中天高片雲靜野曠遠眸空潭
水映人綠林花背日紅我非狂阮籍敢效哭途窮

前行饒野趣修竹望重重路僻人難到籬疎酒獨濃石
危蹲似虎松老曲成龍鬣鬣浮雲外遙聞何處鐘

蝶舞閒留影鳥啼空斷腸偶然逢小憇偏喜動微涼村
婦簪花笑田翁負耒忙市朝無此境長嘯發清狂

不盡悲風急疎林落照微漁歌從水起鷗鳥傍雲飛但

見乾坤在頻驚節序非徐徐行漸遠杖履欲思歸

春申廟

寂寂荒原上春申古廟存一江空有跡三楚向誰論野
火黃昏亂風濤白晝喧停舟瞻拜處冷落弔英魂

小西湖

曲徑攜朋入幽篁夾道陰且隨林下跡來聽澗中音石
壁迎人立松風和鳥吟扣扉聊暫息勝趣再追尋

岳墓

芳名存墓道正氣結重陰南北千秋恨松杉一點心悲
風黃葉路暮靄白雲岑墨客經行過留題痛古今

山行

山徑清秋候籃輿曲折行風回萬樹靜雲截數峰平棲
鳥迎人語飛泉濯世情人家何處是犬吠雜雞聲

武林客舍留別河南葛萃還

爾我他鄉客情深話每同今宵一尊酒明日片帆風山
色清秋裏江聲細雨中後期難預卜嘹唳聽飛鴻

鄭永思新居

卜得華堂好良朋日講論引風輕入座容月靜窺軒君
有凌雲志我惟避世喧他年起甲第駟馬自連門

長至後三日集碧鮮齋限韻

寒風度溪水斜月挂林西共對孤燈酒連聽三唱雞逃
名我輩少尚志古人齊靜得琴中趣還聞烏夜啼

寒夜留顧環瀛宿

斗酒須盡醉寒威今夜增爐温添獸炭影淡剪銀燈但
覺鐘聲杳空餘月色澄撚髭忘漏永蕭索硯成冰

留樞臣兄夜酌

愛我衝寒至宵長興更長論詩方老杜對酒勝顛張樓
外風揚笛庭前月壓霜龍泉埋匣裏不久試鋒芒

夜夢同諸友暨春浦弟過名園山水奇麗既而登
一閣忽有二女相迎索詩於余時逢皎月即用

月字為起句首字詩未就而覺續成以紀異焉
月向碧空橫樓高夜轉清我來尋勝地誰料遇傾城楊
柳舞腰細櫻桃笑口輕詩成一夢覺惆悵聽雞聲

元旦立春

晨興檢玉曆百歲幾回春椒酒迎三朔盤羹薦五辛人
心原是舊景物已更新簾外香風細梅花暗啓唇

李鶴洲招飲片石山房

庭虛留石補林靜喚鳩歸欲倒金罍酌先持玉麈揮梅
花妬殘雪春色醉餘暉坐久邀明月清光冷襲衣

紅梅

占得春光早，緋英覆短墻。懸暉烘絳帳，滴露洗紅粧。艷奪冰霜潔，香招蜂蝶狂。臨風疑欲笑，妬殺雪衣孃。

綠萼梅

同是羅浮種，橫斜碧水傍。渾疑高袖客，挈得綠衣孃。描黛含新月，堆螺拂曉霜。空山嫌寂寞，清韻伴幽篁。

花朝

春色凌梅榦，風光漾柳條。正當無病日，况又值花朝。惱客蜂聲亂，消愁鶯語嬌。半生多逸興，歸隱託漁樵。

周魯璋招飲

春流直到門，幽意勝山村。繞屋風聲細，垂簾香氣溫。鳥

來分樹色，花落補苔痕。無限殷勤意，飛觴月滿軒。

春浦弟相訂芳園賞梅雨阻不赴

尋梅先有約，我獨未經過。亦擬衝泥至，其如怯雨何。林昏迷晚徑，霧合溼青莎。遙想高陽客，敲壺一放歌。

落梅

今夜臨溪月，花疎影不同。飄零三徑雪，惆悵五更風。玉骨人何在，冰魂夢竟空。相看無限恨，嗚咽笛聲中。

村居春興

前村有佳色，對此送流年。風物同今古，光陰忽變遷。燕穿花徑曲，魚躍水紋圓。賴得琴尊趣，陶然一枕眠。

贈宋戒平

我愛宋公子翩翩濁世中
高歌留夜月急管醉春風
興自今朝發情還舊日同
百年嗟半擲相與話兒童

哭王翊辰二首

王郎五載別相望意怱怱
夜月思千里秋風歎二毛
傷今琴絕調憶昔淚盈袍
薊北關山渺旅魂何處號
館甥成往事絳帳隔平生
不作他鄉客那分舊日情
星飛中夜隕鶴化九霄清
薤露歌殘後傷心見月明

村莊小酌

花柳暗前村春光反惱人
睡餘長畏客酒熟乃呼隣
白

日歇芳草青山逃俗塵
田家多逸趣藉此寄閒身

送別麟友弟

煙花迷遠渚風雨送殘春
從此一杯酒渺然千里身
輕衫離故郡匹馬入游塵
努力青雲上名成慰老親

寄繼初弟兼柬張長源

田園我獨卧賓館爾相過
不睹春光老安知別意多
鶯花依客繞林岫向庭羅
爲問煙波叟浮家近若何

送別家羽九

乍歸歡未罄又復惜離羣
慷慨題詩意殷勤帶酒醺
衝江波嚙岬浮嶺樹黏雲
孤館空愁予相思對夕曛

遣興

草閣輕扉掩陰晴梅雨天枝低禽哺菓火活鼎飛泉邱壑追摩詰風騷憶浩然南窗閒枕簟容我抱琴眠

環瀛五十壽二首

耿介風期在顏唐志不移知非伯玉早琢句達夫遲春日雙柑酒秋江一釣絲幽軒紫氣集願進碧筒卮文藻翩翩日名場海內聞書成推卧虎賦就可凌雲青嶂騷人筆紅榴舞女裙百年家學在追憶誦清芬

夏日閒居

閒居無所事誰伴笑談餘蟬噪千章木風生萬卷書嵇康琴自韻阮籍禮常疎一枕難成夢松窗漏太虛

夏日同含雅對雨

門巷時幽寂蕭蕭風雨過高梧驚宿鳥曲檻亂鳴荷但得青尊滿能忘白髮多今宵涼氣襲詩就共高歌

七夕同含雅環瀛集尺木居

移席黃昏靜微雲掃碧空簾疎篩夜月露重滴梧桐天上雙星會人間舊友同深閨少婦怨擣素待秋風

蝶

行藏東復西風穩任高低薄露香鬢嫩輕煙粉翅迷花前時戀戀雨後亦栖栖一夢翩然去相忘與物齊

陸原亭以詩見貽次韻酬之

囊中多麗句堪對阿戎談才調真無敵詩懷實可探秋
光雲外落花氣露中涵世事君休問營營若箇諳

贈別吳門歸靜侯

歸生吳下士雅意世間無秋月歌翻曲春花酒貯壺鄉
心一水隔客路片帆孤別後相思處煙波遍五湖

早秋喜雨

坐起朝來穩炎歊漸已收林疎幾點雨簾卷一庭秋心
已隨涼淨身還與世浮催科不入耳高枕更何求

病中

爐火暗香浮重簾不上鈎雲山枕畔夢風雨病中秋絕
穀嗟元放逃名想伯休園林叢桂發何日任遨遊

冬夜有感

擁爐人不寐誰伴引壺觴燭影參差照瓶花斷續香寒
鴉穿樹曲明月印庭方身世依然在何緣得兩忘

千尺雪

即趙凡夫
徵君丙舍

趙氏孤墳在春回澗水邊挂流飛練白噴壑撒珠圓空
閣雲留卧寒梅雪暎顛蕭然塵世外時想買山錢

初秋對雨

開窗動幽興殘暑暗消磨不是雨聲足誰分涼氣多顛

風捲葉墮飢鳥逐蟬過物色凝蒼潤高槐挂女蘿

歲晚二首

門外驅儻戲羣兒擾擾音少貪時事改老厭歲華侵臘
盡催寒轉春回費鳥吟殷勤置佳醞風韻在梅林
素厭趨塵事蝸牛自有廬呻吟李杜句枕藉老莊書小
圃閒挑菜空池學種魚偶然見新曆屈指日無餘

春陰

萬物欣春好誰知盡日陰梅橫寫瘦影鳥並訴愁心淅
瀝時驚夢空濛半翳林端居身不出惟有睡魔侵

雨窗漫興次諤廷姪韻

起坐東齋冷爐灰撥尚溫葉喧風獵樹絲散雨翻盆菊
圃殘英隕池塘漲水渾宵來吟咏處滿壁潤題痕

寒夜酒酣乘月尋春浦適遇含雅環瀛罷飲將歸
挈之過同蘭館浩修姪亦未寢相與步月中庭
清話而散

清狂乘薄醉不避夜霜侵踏影寒生月敲門客會心放
言驚嫚罵挈伴喜追尋話到愁添處天橫耿耿參

寒夜二首

重簾垂永夜歡笑破愁城古椀香柑酒寒庖鮮鯽羹雲
凝釀雪片風勁峭鐘聲無奈提壺起來煨折脚鐺

牽衣復挽鬢燈火照庭隅海石存寒雪狸奴聚煖爐風
尖人面刺月黑雁聲孤凍筆題新句雲牋半有無

早春書懷

東風漸解凍濁酒破愁圍雁度輕寒去春從細雨歸時
鳴鼓角處處剪裳衣更歎年光改蹉跎兩鬢稀

送見遷弟之顛兼寄仲兄

我兄勤吏治我弟滯儒冠挂席三千里吟秋十八灘
羹漸遠餉書字祝加餐性拙甘時棄耽詩滌肺肝

過龍華禪院遇趙丹山蔣啓辰陸秋谷諸子

金碧何朝寺錢王信是龍莊嚴窺法相疎豁聽華鐘林

靜風聲細花深香氣濃我來訪蘭若邂逅一相逢

新秋偶咏三首

我愛新秋好端居念獨深引風憑去就坐月任升沉傳
說推霖雨揚雄作酒箴感時追舊事誰契古人心

我愛新秋好悠然得自怡興來書白練閒去隱烏皮雨
網蛛收急荷珠風轉欹吟成詩未穩撚斷幾莖髭

我愛新秋好孤懷淡自欣墻頭微露翠池面細生紋林
菓隨時摘園蔬任意耘門庭雖寂歷幽事日常聞

歲暮過綠巖伯南園

同是園林勝蕭條暮景非松枝枯勒帽石角露鈎衣逸

與閑中發鍾情物外稀我儕本坦率坐對樂天機

寒夜同含雅飲尺木居

久負酒中趣別來何所歡安貧生計拙含雅有計拙
曹何用之句投老素

心寬月迴踰垣照風尖透幕寒與君同一醉有志棄儒

冠

清明郊行有懷隱居之樂

林轉疑無路縈紆一水喧風花浮撼日野竹暗團村小

圃饒春色幽居靜客魂臨溪沽酒肆插柳護柴門

立夏前一日扶疎堂賞牡丹

三徑半蒼苔幽居絕點埃春隨杯底盡花向雨中開醒

酒穠香入侵衣艷影來騷人多逸調欲和愧無才

冬夜步月有懷山莊諸子

緩步何清切寒生月滿衣愛他孤影潔悵我素心違鴈

剪霜華冷風刪木葉稀蕭條感歲晚人獲稻梁歸

早春山亭

梅與人同瘦春回各有情冰姿空自艷霜鬢已頻更得

穴魚旋隱營巢鴉互爭但教心地淨頓覺眼前清

六十自嘲

鬢鬢兩皤然逃名六十年衣冠非我事風月為誰妍採

菊臨三徑編籬隱數椽圖書老倦讀便腹晝清眠

雪夜

白雪三更候疲癯老病翁一燈黯淡裏殘夢有無中瀉
竹心俱碎飛花眼半蒙自嗟精力退愁思結簾櫳

退筆

已秃管城子雲煙舊繞身一朝思却汝半載惜依人回
首霜鋒銳傷心塚草陳形骸將底用感歎欲更新

九日可上人招集立雪菴

地遠淨無塵招提歇浦濱空廊丹葉卷平岬白鷗馴偷
得閑身日欣逢落帽辰遠公許飲酒能解客省顰

醉宜亭觀雪

銀海望中迷黃雲擁樹低郢歌傳客唱冰柱誦劉題曉
色明輸幌寒威冷透閨飢鴉無定在得食傍堦棲

卧病

卧病動經旬形骸土木身苦寒花欲凍况我老年人服
藥知無補加餐詎有因滿城風雨裏消却二分春

放言居詩集卷二

相識猶疑向海潮土木良苦寒涼谷東風殊苦平人眼

相識

色即猶如寒涼谷東風殊苦寒涼谷東風殊苦平人眼

雖此中粒黃雲蘇樹外唯堪對客言水針箭膠膠

放言居詩集卷三

姪孫 錫端菽衣

海上曹炳曾巢南著 孫壻葉 承子敬同較

孫男 錫黼誕文

七言律

詠古二首

高才命世傳今古縱酒耽詩任去留歸隱竹溪稱六逸

承恩金殿冠千秋洞庭水險風波惡蜀道峰高汗漫遊

大抵騷人易淪落問天誰主夜郎謀

坡仙與世本無求意氣憑陵不避仇抗眾回天成獨立

負才絕俗若為儔買田陽羨歸山計滯跡黃岡謝事秋
亘古文章希遇合眉山千載白雲悠

初夏小集

口歌擊壤鬢簪花同飲西城處士家一味山蔬調玉笋
半鐺爐火試金芽熏風入架薔薇動皓月當門薜荔遮
夜半酒闌人欲散小樓高處絳河斜

楊柳風

江南二月柳絲盈一望河橋路未平帶雨低颺宜送客
籠煙微蕩正啼鶯漢宮眉黛山光遠楚國腰肢舞態輕
莫怨長堤飛絮盡明年春到更多情

梧桐月

何年栽得傍清池却見冰輪挂碧枝夜靜長留涼影處
窗虛空鎖綠陰時古琴曲罷風初息金井秋高漏正遲
自負良材人不識蕭疎獨有廣寒知

芭蕉雨

碧雲舒卷影扶疎翠葉沉沉覆我廬活火烹茶初試雨
曉窗尋帖正臨書孤懷聽鼓三更後萬事縈情千點餘
却恨秋深零落易蕭蕭此夜意何如

梅花雪

帶月鋤時倚水栽風嚴冰潔幾枝開不知寒自瑤林峭

但覺香從玉礪來放鶴乍歸頻悵望入山高卧莫徘徊
乘舟試訪羅浮去豈學山陰興盡回

秋涼

幾分秋色到墻隈殘暑蕭然爽氣開且把草根刪石砌
好客花片點莓苔清盟夙喜沙鷗結麤飯難邀俗客陪
物外遣愁吟興動一鈎新月挂樓臺

登聽濤閣訪松月上人

欲探幽境入禪林高閣憑欄秋色侵孤艇欹帆穿樹出
遠天沉日伴雲深傍簷啼鳥迎塵客掃榻清風見道心
此日有緣留半偈何時杖履復追尋

仲秋登樓晴望

一片晴光漸欲歸登樓極目思依依千林敗葉隨風卷
萬戶輕煙背日飛鳥去鳥來聲自滑花開花謝露應晞
如何轉眼秋將暮九月寒威正授衣

江上芙蓉

零落秋光覺黯然亭亭獨竚曲江邊臨風綽約楊妃態
帶月輕颺西子妍好景孤懷宜爾伴可人逸興倩誰憐
勸君不用傷遲暮黃菊丹楓畫共傳

菊花

不受陽和縛艷侵清風雖老傲秋深殘籬素影干堆雪

方言唐詩集卷三
三
曲徑寒光萬點金送酒怡情高士興餐英含怨逐臣心
嚴霜莫使凋零盡歲晚相尋伴我吟

至日

陰氣常凝風雪催正逢夜半一陽回每因節序分長短
偏覺人生有去來繡閣錦紋添弱線良宵葭管散餘灰
梅花將報春消息悵望南枝獨占魁

蠟梅

開遍寒花暖未還暗香輕度有無間將春不避冰霜骨
當臘寧爭桃李顏白雪滿庭看玉樹黃英斂鬢鬪金鑲
昔年占得風流號留伴孤山處士閒

冬暮即事

黃葉環扉擁戶深敝裘爐火避風侵凍雲欺日寒生粟
飢雀翻枝雪遶林舊榻雙鈎供展玩新詩寡和費沉吟
歲窮儘把愁先逐猶恐愁生向酒斟

悼亡兒

甲戌春余子培剛以微疾而殞哭之慟昔人云
情之所鍾正在我輩雖不至喪明之悲豈即同
螻蟻之視痛悼之餘漫成一律

生汝劬勞幾度春偶沾微恙竟亡身已甘無祿灰心甚
無奈餘哀淚眼頻殘月疎簾渾似夢孤燈細雨暗傷神

世間只有看花樂翻爲看花痛二人

因看花
得病

次韻送家孟之顛

爲客長途水陸更今朝分手重行行挂帆白浪雙江渺
策馬青山一劍橫花縣憶兄新錦製蘭陔奉母綵輿情
虔州相去三千里來往雲鴻莫計程

與張子威夜話

雲淨天高孤月清與君聚首訂詩盟興逢旨酒狂逾甚
話對良朋意敢輕依草蛩聲悲露重隔簾螢火逐風行
相知未久神相洽略迹忘形此夜情

秋日書懷

霜林落葉半晴陰對此蕭條起遠心白鴈不傳雲外信
寒蟬空向壁間吟登樓作賦才偏拙托物悲秋感自深
種種相思人不見微茫月色夢中尋

曉起示兒

曉來庭草喚童刪一片清光舉日間綠水靜看魚躍躍
秋林細聽鳥關關芸能辟蠹琴書潤塵不揚塵筆硯閒
愧我年來聞見寡莫將廢學任癡頑

晚秋聞蟬

愛爾生來韻獨清高居槐柳倚身輕瀟瀟雨後淒涼景
颼颼風前斷續聲遠道客驚時易改深閨腸裂夢難成

于今秋晚歸何處玄鬢凋零百感生

次韻送別高元友

一室蕭閒秋氣爽日來喜爾靜中過俄聞江水揚帆急
愁對離顏帶酒醺颯颯寒風從北冽哀哀孤雁向南多
前期何處重相遇騷雅詞壇一放歌

不寢

萬籟無聲四境清况逢孤月一庭明酒懷多為愁中減
詩句時因夢裏成開卷挑燈長夜課思兄念母異鄉情
明朝可有登高處極目遙天感慨生

九日登丹鳳樓

九日來登丹鳳樓憑欄俯仰豁雙眸天低樹迴微雲淡
江闊潮生白日流漁笛空中音嫋嫋沙鷗物外意悠悠
不冠落拓何須整野菊隨人插滿頭

碧鮮齋賞菊時有上人在座

今日招賓興不孤良宵晤對座相呼懸燈影射花高下
把筆詩吟思有無坐久不妨邀月上醉歸何待倩人扶
堂中喜有空門客世外疎狂亦我徒

送秋次韻

寒氣初凝襲我衣愛秋偏欲送將歸鬢眉無恙人如舊
節序頻更事已非白鴈烏鴉成隊隊亂雲殘葉共飛飛

清商奏罷風霜急萬木蕭條瘦不肥

冬日即事

一年四序本無蹤送得殘秋又復冬
葉落但看枯木瘦天高嘗被凍雲封
朝炊白酒情何熱晚撥紅爐興更濃
任我揮毫狂不盡劃然長嘯豁心胸

小齋酬陸簡兮見贈次原韻

長夜挑燈無盡時談深惟有兩情知
栽花愛月嫌吾癖縱酒貪吟笑爾癡
富貴皆空元亮節乾坤常在少陵詩
前賢不改貧中樂風雅何人是我師

夜雨

空堦靜聽徹宵聲滴入愁人耳更清
一枕淒涼多病况孤燈惆悵讀書情
瀟瀟窗竹催殘夢喔喔鄰雞報曉更
我獨安居無所事天涯兄弟隔平生

諸兄自贛歸得悉署中近况

諸兄一別歲將殘今日還家聚首歡
囊橐空存古劍缺風塵不改舊衣冠
他鄉目覽山川勝遊子胸藏宇宙寬
傳說琴堂紛案牘性成疎懶敢求官

甲戌除夕

千門爆竹歲云除安樂年華意自如
一載多隨忙裏過此宵莫使夢中虛
梅花含雪經春綻柏葉浮杯待漏疎

分付山童頻灑掃明朝吉月又更初

乙亥元旦

年年四序迭相推天運循環無息時鼓角頻驚新歲月
春風猶識舊鬢眉屠蘇傳飲應消病寶鴨飄香自解頤
更見紛紛飛瑞雪民豐物阜卜休期

人日

雨雪雰雰幾浹旬幸逢晴日正宜人挑來生菜調羹嫩
吹落殘梅點額新乍見遊魚爭躍水復聞嬌鳥共啼春
安居不比思歸者何用題詩歎客身

薛玄卿有人
日思歸詩

元宵喜晴

淒淒風雨滿乾坤喜得晴光到上元玉樹吐花燈萬點
碧天飛鏡月千門曾聞白粥祈蠶地傳說黃柑沐主恩
四海清平應戶頌管絃鼎沸曲中論

一粟菴探梅

踏徧芒鞋何地尋竹籬花徑入檀林橫斜疎影臨風淡
斷續浮香度水深養性應無人我相悟空須得去來心
夕陽西下遲遲步細聽還家好鳥音

憶亡兒

人世難逢開口時追思往事淚雙垂去年攜我花間笑
今日招魂月下悲假命暫參韓子喻痛腸怕誦樂天詩

有緣一面情難割寂寂春風好夢期

庭梅盛開為雨所摧感賦

玉骨冰肌倚畫欄隔簾疑在霧中看只應的皜當春發
誰料蕭疎為雨殘聞咏空成處士恨緘題難寄故人歡
榮枯物理終無定頓悟浮生如是觀

贈含雅

欲買山居先買鄰忘年交好性情真五龍絕學才難並
九世同堂誼更親有酒邀伊常笑傲無名伴我共沈淪
不矜前代榮華事高卧林泉一醉人

廉兒病愈喜賦

骨肉團團樂事真生來天性本然親六年兩拭愁中淚
余連喪二子一月幾經病裏身廉兒近數病鶯語纏綿迎曉景柳絲孃
娜綴花茵今朝喜爾安眠食滿目晴和萬象春

春日懷王翊辰

駒隙年光挽不留仲宣別久思悠悠江天柳色經春改
風雪梅花憶舊遊易水聞歌增俠氣西山對景却離憂
何時歸養華亭鶴峰泖招尋獨我儔

清明郊外

萬戶新飄榆火煙乾坤落落故依然花開花謝臨江岸
人哭人歌向墓田插柳已驚更節候試衣猶怯近風前

憶兄客路三千里料得思家又一年

高青邱詩清明無客不思家

新燕

二月殘花點竹扉俄聞新燕語晴暉已隨秋社飛飛去
又逐春風隊隊歸細雨輕煙侵水舞畫堂粧閣覓巢依
當年王謝還家後目斷雲軒淚灑衣

訪慧目上人

嬌鳥啼春花木森扣扉寂寂似山岑已歸蘭若長栖地
可悟真如不染心支遁愛閒求妙道遠公好靜買空林
得無玄度來尋日坐向明窗惜寸陰

雨中返棹

細雨斜風一葉舟蓬窗四望意悠悠樹隨曠野參差出
山入濃雲高下浮逐利應嗟江上客忘機却伴水中鷗
扣舷歌罷歸何處兩岸青青徧麥疇

三月三日登是亦樓

上巳佳辰景物妍登樓空翠遠連天鶯聲漸向風前老
草色常因雨後鮮豈必流觴逢曲水不須修禊集羣賢
夜來醉入尋春夢獨向天桃穠李邊

送繼初弟之贛

燕燕差池入畫梁送君三月日添長將辭申浦柳初綠
想到虔州梅漸黃湖上風光懸客夢山中春色助詩腸

吾兄若問家鄉景花月尋盟世慮忘

諸同人桃下小飲分得妍字

踏徧園林春暮天含杯桃下集羣賢迎風冶態能銷恨
浥露濃粧欲鬪妍竹影搖空日影碎歌聲未歇鳥聲連
催詩何待如金谷向晚紅霞倍覺鮮

尋春次春浦弟韻

一片韶光媚遠天賞心何處樂流年長堤芳草迷驄馬
曲岸垂楊繫畫船恰恰嬌鶯啼暖日輕輕粉蝶度晴煙
尋春何處留踪跡趁取東風片語傳

牡丹

落盡殘花已過期惟君殿後獨盈枝酡顏能釋春風恨
艷質空勞曉月窺百寶欄前傳酒日沉香亭畔賦詩時
翠幃錦帳須當護莫使羣蜂取次知

含雅俯和對月詩見示疊韻再柬

乍聽城樓鼓又三坐深愈覺味閒甘留連夜月侵窗牖
狼籍春風助笑談絕俗林泉君獨往熏人名利我寧酣
每懷曠達同元亮縱酒耽詩不諱貪

陸鶴坡先生招飲殿春軒芍藥花下

習家池館勝山阿綠樹陰陰滿薜蘿鶯語和風搖細柳
魚吹碧水撼新荷名花伴客同佳話皓月臨軒獨放歌

愛此光風留竟日青銅塵垢藉君磨

水中月

綠陰倒挂影婆娑俯視清光夜湧河煙淨只疑沉玉鏡
風翻常訝碎金波謫仙縱飲乘流去武帝登臺弄影過
此際靜觀同一夢人生虛幻更如何

李鶴洲招飲偶病不赴賦謝

清和天氣日開筵傳說薔薇花正妍好鳥停雲朝喚友
高梧聽雨暮生煙但嫌病肺難爲飲却喜耽詩自在眠
莫道慵疎虛此席夜來夢繞曲池邊

夏日閒居

我性疎狂似放翁脫巾林下灑松風一聲啼鴉山常靜
數點殘花樹半空詩爲腸枯難免拙書因腕弱敢求工
安居長夏消何事只在清虛冷澹中

題齋壁

多病殘軀力漸微小齋久已閉雙扉紅榴礙屋呼童折
雛燕離巢傍母飛寶鴨香凝風細細筠簾日射影輝輝
自憐才拙無佳句粉壁留題信手揮

對雨東顧環瀛

睡起調琴半掩關羣鳩逐婦出林間風來虛閣湘簾靜
雨過空庭萱草閒量窄難添尊內酒病多時減鏡中顏

方言居士集卷三
三
憶君獨坐幽齋裏好畫丹邱數點山

解頰

身在紅塵擾擾間此心蕭散任疎頑但知開戶邀良月
每為登樓憶好山碁局空消清晝債茶鐺常伴老僧閒
幽蘭初放溫如玉坐挹熏風一解頰

歲暮次韻酬簡兮

學得清狂羨次公居然逸興與君同且拋世事風塵外
聊放情懷翰墨中曲徑迴春苔意綠小窗含日醉顏紅
青陽逼歲無愁暮別後新詩各滿筒

立春後一日維則環瀛暨諸兄弟集頤情閣觀雪

城郭參差雪萬家光搖銀海亂生花殘籬曲巷迷行路
凍木寒雲失暮鴉緩奏梁山清有韻輕裁紈扇淨無瑕
春風乍轉年光好攜酒何妨避世譁

登樓

我今何處破春愁岸幘登樓豁遠眸紅檻飛花橫短笛
綠楊斜日聽鳴鳩為憐美景經年別欲結閒緣半日留
趁取韶光無限好止談風月儘優游

春日東簡兮

二月陽和景物融閒情盡付酒杯中小橋弱柳懸晴日
孤閣殘花度曉風傲骨恐難濁世見放言應許古人同

半生試問誰酬酢魯望江湖句獨工

贈朱右韓

知我如君勝自知忘年從此數追隨
向推瀟灑宗之度不減風流張緒姿
纖月銀燈孤閣話名花斗酒百篇詩
他年淡墨題名姓車笠無忘訂此時

新秋同環瀛荆山西園晚步

玉宇森沉散夕煙園林風景作秋天
纖鱗避釣潛深沼叢竹籠雲咽亂蟬
閒裏鳥聲吟落日靜中山色度流年
桂花開候涼應早聊借幽香共醉眠
夜坐懷簡令時養疴閒園

斜月纖纖挂玉鈎滿天風露隔簾幽
壯懷安石貪高卧多病文園謝勝遊
案上琴書孤榻伴籠中藥餌一燈留
故人別後無消息昨夜梧桐又報秋

木犀

連卷老樹得衡陽景占三秋清韻長
欲御風尋仙友窟忽疑身在小山旁
鷲峰落子凝朝露蟾魄含香吐夜光
桃李無言君莫笑歲寒能幾耐冰霜

秋暮懷環瀛

潑墨淋漓宇宙寬閉門多暇日追歡
扶筇得句花含笑把盞懷人曲乍闌
黃葉秋疎山骨瘦碧天雲淨雁聲乾

臨風無限徘徊意靜對寒松子細看
簡兮含雅同過問病詩以謝之
微雨初過一徑賒不嫌泥滑到山家
他時坐對惟酣酒
此日招尋獨煮茶丹桂流香朝浥露
海棠爭艷暮含霞
相期秋色平分夜小閣同登待月華

送秋

窮陰促節任悠悠無限淒涼送素秋
離別易添思婦淚
往來多白少年頭雲籠淡日光逾悄
風剪寒林氣更遒
曠恨漫嫌青女杳井梧葉落看重游

冬夜嚴寒懷簡兮含雅

三冬文史慕前賢生不逢時且醉眠
白雪寒燈愁裏夜
清宵明月夢中天還同北海憐烏日
翻勝南州語鶴年
遙想鮑詩吟縮蝟強呵凍筆轉淒然

哭簡兮二首

歲星久謫復歸天幾度思君倍黯然
散亂篇章遺舊篋
飄零魂魄了塵緣三杯醜薄風前酒
一枕淒涼葉底蟬
何處笛聲偏啞曉空懷曩昔月初絃
破帽青山六十年故人時命實堪憐
名山不植千頭橘
負郭何緣二頃田白雪陽春多得調
清風明月不須錢
深宵錯認君猶在一夢相尋到九泉

寒夜含雅維則暨諸昆弟縱飲尺木居賦詩為樂
余卧病不赴次韻戲東

抱病齋居烹谷簾豈知甕醕夜頻添燈花綴影眼生暈
研墨餘痕筆退尖暢敘便歌新白雪苦吟還憶老蒼髯
有時劇飲能呼我對酒先拚歲酒拈

白香山詩歲酒先拈辭不得

連雨不止有懷含雅

東風簾幙溜聲潺杖履誰能數徃還高卧倦吟花片片
洗愁對酒鳥關關頻虛佳節心情懶不住轟雷好夢慳

驚鷲前雷震主一春多陰濕

何日暄和春景煖相逢一笑慰蒼顏

霖蒼姪虔州歸夜飲潤業堂

淒風淅淅雨颼颼坐聽松濤冷似秋老榦漸摧無限恨
孫枝競秀更何憂歸巢啼鳥傷春色撲酒飛花減別愁
近歲病多成懶癖迂愚莫訝背時流

送霖蒼復之贛署

幸汝西歸慰寂寞如何千里復睽違今宵片月尊前醉
來日孤帆雲外飛風雨離人懷雁序河梁極目戀庭幃
應須早趁高秋水惶恐灘頭減石磯

放言居詩集卷三

放言居詩集卷三

放言居詩集卷四

海上曹炳曾巢南著

姪 孫壻葉 承子敬 傑士電發同較

孫男 錫黼誕文

七言律

同張含雅嵇修五戴咫御西園納涼

長夏園林好納涼
羣賢嘯咏任徜徉
風來屋角翻蛛網
柳暗城頭半夕陽
已遣歌喉聲繞木
難邀罵座客飛觴
百年良會能多少
况對池臺晚景蒼

新秋即事

放言居詩集卷四

高梧一葉下樓臺默坐披襟實快哉大熱乍收酷吏去
清風徐引故人來陰沉樹杪蟬聲懶掩映簾櫳日影催
久不作詩詩思澁欲酬佳句鎮徘徊春浦示新
秋書感詩

七夕集閒園

松竹森森半掩庭鷓鴣棲聊借一枝寧試看水影搖窗白
盡放天光入座青促織催殘秋夜月遊魚躍破墨池萍
人間聚散原無定底向今宵感二星

秋夜步月次春浦韻

雲淨風高秋夜長小軒朱檻映清光雁披月色天微碧
林染霜華葉淡黃老去情懷同幻夢近來學術似凶羊

祇今桂醕牽愁盡扶杖從教形影忙

喜雪

雪花片片灑長天散逐狂風態自妍冷艷穿窗聲密密
丰姿撲面舞蹁躑衝寒東郭先生履乘興山陰逸士船
不是藍田皆積玉冰壺貯酒卜豐年

人日病中柬諤廷姪

掩關莫笑病纏身掃地焚香自養真曲檻題詩花撲面
小園挑菜徑生春占晴差喜人還健裁綵須知鬢又新
遙想鳳樓登眺處郊原浩蕩隔江濱

春寒閉戶柬含雅

人生休放墨痕乾，憔悴年來綠鬢殘。每聽雨聲驚節換，因看梅蕊怯春寒。詩酬險韻我方苦，醉是真鄉爾覺安。大隱何曾愛孤僻，好攜簞笠釣清湍。

春暮柬含雅春浦

花事凋殘春可憐，遣愁無奈抱琴眠。簾前蹙絮呢喃燕，雲裏吟風縹緲鳶。詩篋尚留殘韻在，布囊猶有幾錢穿。我儕共識幽居樂，時序真如蟻磨旋。

春暮書事次荆來姪韻

寂寞東風幾變更，綠陰池館寄幽情。笑禁梅豆穿籬摘，靜看魚苗促絮行。春去思隨芳草怨，晝閒心共落花輕。

只今雨露如堯舜，波及林泉醉濯纓。

雨後散步

綠樹和煙雨後迷，扶兒蕭散畫橋西。枝繁葉密藏花穩，水漲萍浮壓岸低。偶爲摘蔬思縱飲，應勞拂石坐留題。耽吟有僻無佳句，辜負攜囊喚小奚。

新構東軒成閒坐書喜

燕雀無情似有情，環飛檻外賀軒成。戎葵獨據庭心放，苦竹斜針石竅生。一榻清風終老計，幾聯新句故交評。縱然此樂須天賦，鷗鷺心期夙已盟。

養靜閒園睡起書事

詩卷拋來慵唱和葛衣羽扇小涼生鳥從屋角窺人過
蟬向鄰家傍樹鳴醉裏狂言醒後悔憤來書事罷還更
無窮世態多嘗徧萬感惟應一笑輕

苦熱不寐同維則夜坐

瘦骨支離就枕難高軒相對且言歡少耽詩句思多苦
老去文章氣尚酸燈火青熒未散夜窗黯淡月初殘
我儕若用安心法準擬投竿到雪湍

病起新晴

乾鵲羣飛噪短檐清光一片映眉尖未殘籬菊空侵夢
濃篆爐煙半出簾欲寫秋容吟力倦強支病骨客談淹

平生謬得安閒術白髮蒼髯兩共添

生朝自述三首

勘破功名多病休樂天知命自由由欣簪黃菊秋欹帽
厭伴紅裙鬢斂眸袖底煙霞耽逸興壺中日月滌沈憂
從今檢點抽身早默數年華幾度秋

鹿車相挽廿餘春敢惜勤勞度此辰書卷常留兒作伴
杯盤不厭客過頻梁鴻遯跡從棲隱龔缺歸耕序主賓
回首自慚多放蕩和顏甘我醉時嗔

閒居寂寂少知聞自覺迂頑陰惜分半偈爐香僧共話
一丸邱壑鳥同羣琴書裝點師彭澤蛇蚓臨摹病子雲

多謝秋風未搖落午窗時誦北山文

新釀梅花酒

閒居喜誦酒人篇釀法傳來香色妍好鳥交愁花信雨
幽懷甘向甕中天頻呼從事歸臍腹忽發狂言頌聖賢
醉面纈紋吹不散春風澹蕩興彌顛

再集西園觀桃

林中舊侶各忘機日日花間盡醉歸嫩草碧鮮風細細
小桃紅褪雨霏霏孤尊更酌羔兒酒一曲誰歌金縷衣
剩有殘枝狂興在黃鸝飛去竟何依

遲女郎陳秀不至

春浦屬意一吳女忽有謗言間之情殊難遣作歌

舒憤余感其事用賡一律

嬌鬟縹緲望瓊樓破帽欹斜跨紫騮我也關心眉欲鎖
君寧無恨淚交流陽春歌罷人何處暮雨臺荒夢未休
莫訴衷情此夜月素娥孀獨恐添愁

病後早眠聽庶兒讀左氏春秋

歲暮離羣久索居况逢長夜課三餘古人已厭談經士
孺子寧窺爭長書細雨有情寒未重孤燈無睡夢全虛
半生不覺消磨去欲理殘編奈鬢疎

苔溪姚聖宇以筆見遺作詩贈之

秘法相傳自董生一雙遺我作芝英試箋應許籠鴛換

染墨疑聞殺兔聲
深夜潮喧驚客夢
彌旬舶棹寄鄉情
何時襍被同舟去
來訪孤村箸下名

贈膠城程紫林

善音律

羨君瀟灑鬢如絲
兩袖飄然興自隨
此夜更歌都尉曲
何人繼唱謫仙詞
鼠姑吐艷青春老
蝴蝶偷香綠樹滋
豈敢相逢徒一笑
忘形沉醉莫嫌疑

東城晴望次麓蒿兄韻二首

身上高城趣轉閒
是村是郭渺茫間
遙波滉漾疑無地
層靄迷離似有山
曲岸鳥隨帆影沒
小橋人拂柳絲還
乾坤四望澄如鏡
冷落僧家晝掩關

勞生暫喜得身閒
一片晴光宇宙間
無地可能容白眼
有錢何處買青山
酒旗茅店雞聲杳
漁唱煙洲棹影還
觸境相忘宜小歇
寸心已透利名關

謝上蔡云透得名利關便是小歇處

五日維則對奕聯敗戲贈

得失人情與奕同
顏唐欲笑白頭翁
一從敗局名難振
自惜雄心力半空
寶鴨浮煙香漠漠
庭榴細雨葉濛濛
蒲觴對飲我先醉
低映燈光纈面紅

初夏閒居

長夏閒居興覺孤
林花開落酒傾壺
雨深檢韻心思澀
綠暗臨書點畫麤
片刻解衣朋乍過
暫時閒夢鳥爭呼

此生猶擬扁舟去風月煙波伴釣徒

煙雨樓

煙雨樓高倚碧空置身如在畫圖中
窗含東郭千家火簾捲西村萬木風
鷗鳥斜飛雲漠漠菱舟纔散月朦朦
我來登眺晴偏好未必空濛氣便雄

秋日早行

荒郊徑滑露初濃曉日曛曛策瘦筇
千畝禾香披野況一江水色淡秋容
風傳古磬遙藏寺樹擁晴雲遠當峰
欲訪隱淪何處是蒼茫西去問遺蹤

靈隱寺

松柏森森覆綠苔珠林殿閣倚雲開
峰巒縹緲穿霄立澗水潺湲入檻哀
僧報午鐘歸徑去客從磻戶御風來
殘碑摹得當年跡南渡鑾輿過幾回

武林道中有感

行遊越嶠故鄉違買得輕舸放棹歸
閭井夢從孤枕得關河心逐片帆飛
秋風張翰思蓴菜夜月嚴陵坐釣磯
乘興來時今又返吾人去住揔忘機

落梅

尋芳杖履過橋東羨殺襄陽興不窮
春徑絮飛人散後疎林雪逗鳥聲中
徒勞月下三更夢惆悵江干一笛風

莫怨美人易遲暮生成色相本來空

飲芳園桃花下

風乍調和日乍烘天桃的爍對詩翁神飛野鶴青雲外
身坐殘春紅雨中挈伴來遊尋道士提壺就飲擬劉公
宿醒未醒重添醉扶杖柴門月滿空

春暮小園漫興

脫巾坦率樂天機捫腹逍遙病自稀正喜詩懷隨處是
却憐春色又將歸柳拖水面驚魚躍花散風前逐鳥飛
酒熟西鄰呼共酌紙窗石磴竹籬圍

柳絮

點點飛來抑復揚麗華閒步欲沾裳空颺細影愁心碎
輕繫遊絲別恨長翠葆同時鋪陌路綠陰異日糝池塘
若爲勾引憑風去帶得春光勢便狂

閒居

寸衷那許世情干鎮日閑居身自安片刻秋光閒裏度
一庭花影靜中看詩求警句向循循得棊許饒人着着寬
乘興開尊無客至暫邀明月共追歡

香雪亭觀梅

春在橋邊酒在尊芳心終不負黃昏微風淡影初殘夜
細雨寒香半掩門幽伴欲依松竹逕閒情常寄水雲村

與君歲歲傷離別幸有東皇為返魂

浴罷口占

暗麝濃花開晚涼更驅豹脚解衣裳
蘭湯滌去渾無垢雪乳烹來別有香
半世偷閑將白髮頻年廢學近黃楊
呼兒除却堂前擾惱殺鳴蟬亂夕陽

病中九日菊花未放悶坐無聊口占誌感

東籬寂寞徑苔荒畏病齋居益自傷
白袷憐人侵短鬢黃花愁雨避重陽
新春玉粒迎甌滑頻擘金苞濺指香
潦倒衰年惟藥物安心之外更何方

新年紀興四首

抱病頻年怯舉觴屠蘇遞飲笑難當
眼枯視久空花墜肩竦吟餘老興狂
綵蝶新翻羞插鬢酥盤舊薦謾充腸
何堪卧聽排簷溜滴破春愁幾許長

年華世事向誰論人日悠閒聚弟昆
春水漸生挑菜渚風煙時失落梅村
欣傳鳳紙騰新詔傾聽鸞輿沛

湛恩運值昇平恣逸樂憑將清夢爽心魂

閒亭休息得三宜坐對春風澹宕時
稊柳斜拖拍岸水歸鴉爭占結巢枝
量才却愧三千牘揣分須吟百一詩
覽鏡不堪搔兩鬢行藏誰假問靈龜

人情似紙薄重重歸去山村隱興濃
遠澗泉流冰泱泱

方言居言集卷四
九
隔林社飲鼓鼙鼙擬將新曲酌黃鳥旋汲輕瓢煮紫茸
自分安居成懶癖鷓鴣棲何地不從容

贈虞山周拜菴

去年小圃酌松醪乘醉看君落筆豪襟被便歸秋夜月
帆檣重泛海門濤囊空本是憐孤客鬢減何堪見二毛
斜抱桐孫求伴侶江湖誰謂不容舫

冬日牡丹次陸錫山韻

風逗茅檐短日催情懷誰復夢瑤臺乍聞國艷凌寒見
疑是仙家幻影開造物有緣添色相春光何事戀塵埃
人心已厭年華老富貴偏從晚景來

薄暮苦寒書事次廉兒韻二首

破帽低垂兩鬢遮殘冬寒日向窗斜每因善病心如水
却笑浮生境似花浥浥爐煙醒後散微微梅韻靜中賒
青雲自是兒郎事遲暮何須戀物華

西風凜冽倩幃遮庭樹蕭騷門巷斜一札來朝姑縱博
孤燈昨夜悞成花歸鴉作陣呼雲凍坐客忘機喚酒賒
醉後不須親簡策他年恐悔讀南華

歲暮懷環瀛

窮冬分手動兼旬衰病常疎禮法人顧我烘梅將吐艷
思君添頰已傳神重簾暖閣圖書古孤榻寒燈夜雨新

芋栗舊園收未得於今白首是全貧

正夫姪招飲五石山房梅花盛開追感舊事

亭畔梅花色鬪妍坐來今日興陶然綠衣媚客初晴月
絳雪凝粧薄暮天詞苑高談悲往事園林暢敘愧前賢
於今却笑風流盡穩卧羅浮乍息肩

元日立春柬諸友

笑折松枝對五辛此身欣作太平民青陽自有重回日
白首難逢再少人點綴綵花蝴蝶勝安排圖畫玉堂春
試開綠蟻新醅酒沉醉東風一角巾

宿雨新晴過春浦齋適友人攜尊梅花下款敘竟

日春浦有作次韻和之

白日高高積雨收城邊風景一時幽尋芳恰遇吟驢背
把盞何須費杖頭邂逅談玄新得伴追隨閒咏舊同遊
一聲長笛清歌起總使無情也自留

白薇花次韻二首

世傳薇有五色及觀譜之所載詩之所咏特紫
薇一種耳歲癸巳園丁持一株來告曰此白薇
也呼童栽之三易寒暑不生萌芽余深惜焉今
年夏秋交忽抽條發蕊花放如雪既賞其清芬
絕俗復異其槁莖再榮廉兒詩以咏之即用韻

各賦以誌喜云

白薇不發今三載乍喜瓊芽色可人
艷質已殊荀令宅
幽姿常比宋家隣沙鷗浴水顏猶減
蝴蝶凌風粉未勻
寄語寒梅誰作伴隔時相望各離塵
玉質繁葩刺眼新曲籬斜徑闌無人
不妨綸省供裁詔
何必山家喜結隣零露暗溥洗影潔
白雲晴護墮香勻
薄膚未被麻姑爪已覺仙姿絕垢塵

附原唱

滿林秋爽態偏新露溼瑤姿妬玉人
冷蕊未經同作
侶紫花相對却為鄰光搖銀燭三更
靜色映冰壺一

片勻西掖移栽那及汝清標只合避風塵

觀梅

孤芳長共水為鄰粧點風光信絕塵
茅店酒爐人獨遠
山窗紙帳月初勻
撚鬢索笑先迎臘倚杖行歌更及春
祇恐詩懷動東閣柯亭何必調吹新

雨後園中採梅實

風吹綠葉影離披摘實攜筐恰及時
應與文園消夜渴
休令西子盛蛾眉
苔青路滑人雙屐草綠蛙鳴雨半池
從此呼童勤灌溉
明年有待占春枝
深秋夜坐

秋氣侵衣露下清坐深微覺睡魔生窗虛月落孤鐘度
漏靜天空一鴈鳴吾性疎慵長閉戶人情反覆任爭名
何如酒社詩壇客花下尊前笑口迎

新正二日同雷發姪登山亭望雪適霧起漫空咫尺莫辨

尺莫辨

藤梢橘刺亂如麻鼓角聲聲四境譁霧失千家疑隱豹
雪翻五出滅飛花擬尋瘦影浮香韻暗指寒林曲徑賒
今日杖藜同眺望放懷何用歎生涯

走馬燈

赴敵銜枚永夜行行踪何必計前程去來不辨追風影

閃爍空傳躡雷聲思婦有情馳遠夢書生無路伴深更
任他環向炎中走一滅熒熒作麼生

早春

東風應律送春回兀坐芸窗對綠醅志氣消磨年歲減
頭顱憔悴雪霜堆羞簪綵勝花增艷笑却膠錫齒已頹
檢曆驚時能幾日誰將鼓角兩相催

閑居自述

脩然避世自離塵竹徑茅堂點綴新碁局敲殘清晝夢
病魔泥殺白頭人會叅禪語三千相懶逐名場六十春
老去漸知身世幻敢教鵝鴨惱比隣

方書居言集卷四
三
綠溪草堂即事

作帚東風掃落花開軒場圃近田家出林弱柳籠煙媚
背日輕帆漾影斜耕犢偶從鄰叟借濁醪不厭水村賒
客來呼酌餘杯盡一醉如泥伴笑譁

自題小照

金丹未煉老形骸先托毫端小脫胎魚蟹有情同伴侶
衣冠無分避塵埃每逢樂志留題處少覺勞神莞笑回
留剩兒曹展卷看莫教野叟路人猜

春浦齋白牡丹

羣玉山頭薄霧天冰姿窈窕帔羅仙不愁傅粉芳容減

恐妬啼粧媚態妍千葉臉丹春伴醉一枝肌雪畫難傳

偏宜獨鶴栖遲處

春浦近號
野鶴道人

洗盡纖塵素月圓

一名權
中素月

七夕

娟娟秋風沁骨清疎星淡月傍簷楹落螢宿草不一點
促織驚閨有數聲此夕虛懷無限意經年良會若為情
酒醒仰望銀河遠斜倚闌干別恨生

送春二首

一卷離騷病掩扉扣門誰伴送春歸老年心事嗟時暮
壯歲交遊憶舊稀水底笙歌蛙閣閣風前巢乳燕飛飛
幾番花市消磨盡欲挽東君奈願違

美蔭交加草綠除勞勞此別欲何如鶯花意亂紅顏改
風月情牽白髮疎折柳詩成吟倩鳥過雲歌起戲勾魚
年年判遣春歸去却掃誰人到我廬

附步韻作二首

男培廉

辜負年華只鍵扉十分景色奈將歸漸看柔綠亭亭
合已覺殘紅樹樹稀求侶鶯聲婉轉訴挾雛燕語頡
頰飛流光此去原如駛莫怪留春事事違
修禊纔過話袂除忽聞春盡興何如櫻桃紅綻培初
熟梅子青葱摘未疎橫笛聲高諧郢曲曉餐味美得
嘉魚却憐花鳥無情物也向離亭去我廬

立春賦感次春浦韻

流光空度意難堪試誦新詩對景慙白首連枝涕灑二
青衫諸子計存三交情日薄艱趨走世事年高弛負擔
簷吐蛾眉瑄應律滿園春色共誰探

雨後過綠溪草堂

艸堂雨後靜塵沙疑是東山崔氏家抱節蘸波依徑竹
鋤園漑水鎮心瓜孤懷難覓忘憂草左計真成畫足蛇
却怪來禽與青李一枝風動墮簷斜

招諸姪五畝園避暑

相期逃暑寄墻東池館重陰曲徑通竹密漏穿千點日

簾疎篩碎一團風
棊枰搏擊心偏靜
字畫精深氣自雄
吾老不如羣季俊
莫辭一醉惱山翁

秋日閒居

白髮催年鏡裏新
塵途蕉鹿悟前因
嬉談古古今今事
羞見非非是是人
一肉回甘消永晝
百花含馥負清晨
秋來鵝鴨須常數
祇恐兒童惱比隣

自嘲次春浦韻

心衰面瘦意如何
猶想高陽聚酒徒
紫綺裘存身自適
洞庭春失興全無
家藏美醞
被盜竊去
寂寥山徑傷時暮
窈窕林泉
病眼枯頭白昏昏時
背癢玉纖笑倩代麻姑

遣興

伯勞紫燕兩相忙
不類此翁冰炭腸
籃脅琴摧珍重戴
烏絲闌法厭宗王
脫苞粉節凌霄放
聚食雛兒啜水狂
如此襟懷堪自適
北窗何用傲羲皇

丁未除夕

長筵乍接各懽然
白髮心情七十年
老度光陰醒夢後
節臨遲暮醉尊前
團圓自得兒孫樂
歌笑還依媵妾緣
來歲今宵知健否
門閭且喜矢孤懸
除夕又
得一孫

哭禹門姪

阿咸憐我六骸疲
我哭阿咸強壯時
太傅何辜偏抱恨

童烏早慧更堪悲故衫半灑傷親淚解瑟難調怨婦絲
回首生前事未了九泉覓路歎多歧

梅花次賓川姪韻

獨向寒林帶雪花回頭羣艷信猶賒影惟月伴籬邊瘦
香與魂歸竹外斜處士吟餘神自淡佳人粧罷語無譁
雲烘疑漏丹砂在彷彿仙姝咀絳霞

中有紅梅

浩修姪有草堂探梅之約雨阻不果效放翁體作

詩見貽余採其意率成一律

西村徃歲探梅肥我亦草堂啓竹扉曲曲編籬香漠漠
灣灣流水影依依犬驚蜂蠆穿蘿吠犢負鉏犁帶鳥歸

豈料雨深花亦笑一年一度見猶稀

哭春浦弟

焚餘時檢白雲篇小隱滄江屋數椽張籍詩鳴寧用世
香山年老竟歸禪五更風送殘荆雨一點燈懸長夜天
何事微生留我在吞聲慟哭寸腸煎

放言居詩集卷四

放言居詩集卷五

姪孫

錫寶鴻書

海上曹炳曾巢南著

孫壻葉

承子敬同較

孫男

錫黼誕文

五言絕句

寒食郊行

百五逢寒食田家冷竹扉綠楊斜照裏風急紙錢飛

夜泊

青山遮不斷一水碧蒼茫舟子漁歌歇秋風夜月涼

新月

樓外蛾眉影捲簾獨自看枝頭雙宿鳥夜靜露偏寒
生公亭

生公亭畔坐頑石故依然誰解安心法松風冷碧泉

雪夜

虛庭吐白光疑是天上月乘醉捲簾看飛花點頰髮

題畫

奔湍衝斷石白雲生疊嶂落日小橋西笛聲起漁唱

獨鳥

人來奮翅飛人去還歸宿來去我無關憂然任孤獨
所見

秋水明眸艷遠山覆額青橫雲與卻月徒使畫娉婷

尋春

歲歲春如故來尋獨老癯酒旗村影外紅雨點平蕪

五畝園八詠

峭石凌空

突兀幻奇峯玲瓏漏斜日對此心神融彌覺完吾質

孤亭竹蔭

孤亭臨虛敞綠繞千竿竹不知塵市囂但有清芬沐

層巘雪霽

寒雲乍離散鳴颺振枯條一望清光迴心與空山遙

方音居言集卷五
曲澗流泉

石澗水琤琮回旋清見底魚鳥莫驚猜留待巢由洗

曉渚芙蓉

美人花靨飾映日芙蓉芳沃蕩涵嫵媚朝來鏡裏粧

西軒待月

空廊翔落葉林岫早秋時勝趣誰能會飛來天鏡知

秋香深院

小山叢桂發好鳥鳴相續晝靜碧苔閒霏霏點金粟

名賢舊題

蕞爾幽棲地遍綴前賢迹寄語染翰人臨池有顛客

題畫

寒江一孤艇閒載夕陽歸不見探奇跡白雲來去飛

題便面小景

碧水葵初發熏風柳自斜此中高卧者愁殺後棲鴉

春晴

春色盈青野新晴啓碧窗水陰魚箇箇花影鳥雙雙

七言絕句

靜安寺八詠

赤烏碑

碑碣荒殘積蘚封赤烏事業杳無蹤四方兵甲三吳恨

盡在禪房五夜鐘

陳檜

郊原春色半荒涼
繫馬高歌黯自傷
古木不知天步改
綠陰猶照舊冠裳

蝦子禪

蝦子神通憶往年
宗風留得子孫賢
開山古蹟憑誰問
幾點秋雲漾碧天

講經臺

講臺遺址半荆榛
無復當時說法人
銀杏一株高百尺
夜來風雨吼秋旻

滄瀆壘

滄瀆空時戰馬收
南朝勲業水東流
于今悟徹無生法
千載英雄只一邱

湧泉

繁花零亂委泥沙
點點隨風感物華
獨有湧泉千古在
澄泓長對寺門斜

蘆子渡

蘆浦蒼茫水接天
月明長夜淨無煙
行人不解先登岸
日落還乘渡口船

綠雲洞

方言居詩集卷五
四
祇林幽境稱禪棲東土愚蒙待指迷昔日遠公今不見
綠雲一片草萋萋

朱晴菴孔咸客文五伯小齋觀菊三人計二百五
十歲喜賦絕句三首

三人二百五十歲花下招尋帶笑看濁酒不辭千盞醉
微添春色上眉端

三人二百五十歲坐對高風真絕羣揮麈漫言前代事
盛衰能使後生聞

三人二百五十歲唱和聯翩格調高豈學錦囊年少客
悲歌却自近風騷

夜雨

為怯春寒爐尚溫淒風冷雨到柴門分明滴破三更夢
縱使無愁也斷魂

小樓秋夜

鴈飛宋寂影雙雙斜倚樓頭聽吠犬一片秋雲何處去
空留明月照紗窗

除夜懷家仲二首

手把屠蘇滿玉卮問兒記伯別離時年華轉眼如波逝
浦水寧通贛水湄

古人一日似三秋况易風霜幾許愁有弟林居常卧病

雙江煙月挈誰遊

送麟友弟之顛署

落花飛絮滿江煙西去虔州路幾千對景黯然揮手別
鵲鴿原上草芊芊

月下登虎阜

吳王鬪草此曾留攜杖來尋巖壑秋游女如花歸去盡
空餘明月照山邱

茉莉詞二首

清標幽韻吐芬芳曾對佳人鬪淡粧鬆鬢小衫初浴罷
輕持紈扇拂餘香

竹牀冰簟嫩涼生暑氣微消一枕清羅帳忽驚幽夢斷
街頭暗度賣花聲

哭荆來姪二首

秋風一夜起茅茨吹折人間瓊樹枝書報日斜阿買死
數行清淚不勝垂

妙齡早擅謝庭春如我衰遲豈足論神解玄談從此杳
竹林遊伴是何人

瓶中海棠

睡容未足不禁風掩映簾櫳綴小紅春去堂堂留不住
相思只在膽瓶中

殘月

半映西窗半露寒
依稀殘魄挂林端
開簾欲拜心無緒
錯與蛾眉一樣看

送別二首

秋風歸棹兩平分
淚濺鴛鴦刺繡紋
此別不堪回首望
海天無際水連雲

不如彈指去逃禪
灑脫來生未了緣
從此百端離別恨
隨風散作五湖煙

送春次長洲許子遜韻七首

眼底眇昏兩鬢絲
也隨年少送春時
無才解賦消魂句

敢借橋邊柳一枝

笑踏殘紅狼籍回
荼蘼細瑣爲誰開
年年送別春如故
不覺老從頭上來

一春春事付空花
時去心驚感歲華
柳絮凌空飛作雪
隨春歸去落誰家

感序微吟綠水頭
誰將雅調敵蘇州
當年解釋東風恨
我亦題詩過虎邱

過雲高唱比秦青
餞別南郊索酒瓶
野鳥也知時節換
拚飛還向短長亭

茗汁偏宜鬪玉川
淺甌紅焙竈生煙
誰教海角傷離客

却效醯雞守甕天

太白初浮鸚鵡螺如絲愁緒欲如何傷春莫近花梢露
暗滴良宵淚轉多

贈漳浦趙尊客三首

歲月吟殘雪滿顛松姿鶴骨只飄然應須舉白陶陶去
世路誰憐老鄭虔

回首閩天失故鄉飄流滋味爾偏嘗只今築室九峯畔
收拾閒情付短章

綠蘿幽勝野泉甘夢裏鄉園足笑談猶憶寒窗風雪夜

點盤空訝薦霜柑

去冬尊客在余齋食黃柑歎曰故鄉之物不見三十年矣

贈維揚李校書次禹門姪韻

十里珠簾帶郭斜繁華風景望中賒舊時三月煙花路
拍點紅樓第幾家

春朝訪楊校書素娟不遇二首

梅花香裏恰逢春青鳥啣巾去逐塵門掩東風空自笑
隔籬小犬吠行人

宛轉清歌繞座春凌波輕迹步香塵懸思此夜偷啼處
恐托天涯薄倖人

探梅未放忽有所感

尋芳幾度報花知欲覓高樓東壁詩風雨夜寒愁不住

春光何日向南枝

除夕

老人鬢髮兩皤然兒女團圍雪夜天却怪尊前歲事盡
明朝相見各增年

幼子殤時庶兒寓吳門將試白下寄示五首

呼天欲問路難通病入膏肓不可攻誰說倉盧真有術
只今藥石總無功

老來光景不如前面瘦心枯顧影憐碌碌塵緣方自悔
一番春夢又三年

不獨淒涼垂老身依依兄弟亦傷神白頭多負三生債

空結人間未了因

三年辛苦伯兄恩行坐相依笑語溫誰料終然成幻影

吳山遙識徧啼痕

春風正作白門遊萬縷垂楊挂客愁點點飛花和汝淚
淒然歸夢泣孤舟

贈陳校書雲仙

花下相逢倏五年別來消息兩茫然朦朧夜月情難訴
長託回風一曲傳

萬沛亭招飲卧病不赴咏其齋中瓶梅柬謝二首
不用迎寒驢背吟膽瓶高貯夜調琴知君會得春風意

何必羅浮夢裏尋

冰魂雪魄正宜春想像幽姿絕代人若使坐來燈影下
縱教無語自傳神

集是亦樓觀梅分得十一尤

洗盡鉛華妬玉鈎香傳東閣動新愁恠他看我春宵醉
冷笑陳人雪滿頭

附男培廉作分得十四寒

數株冷艷發林端草閣啣杯興倍歡正是朦朧花霧
裏一鈎新月上闌干

哭亡女慧齡六首

妙齡髣髴髮齊眉六十年遭五六悲白首那堪腸又斷
膝前惟剩一兒隨

乍歇金針聽玉梭紗窗燈火夜如何有時問字來書幌
嘲笑眇昏老眼疴

灌花剪綵喚鋤園朝夕牽衣聚笑喧博得他年歸哭我
那知反為賦招魂

書齋苔砌產靈芝乍見增歡轉覺疑寂寞花梢今夜月
影移如見爾來時

勞勞紫燕繞簷飛引得新雛謝主歸對景焚然心緒亂
哀哀汝母向誰依

淒涼心事與誰論
病卧幽軒晝掩門
垂死夢中驚我起
飛來蝴蝶似歸魂

題陳方尹小照

梧竹叢叢桂吐芬
科頭小酌半成醺
不知君似丹青妙
果是丹青妙似君

春晚

海鷗作伴久忘機
竹塢蘿軒見客稀
春色滿園留不得
落花時帶過墻飛

上巳

右軍瀟灑出塵氛
曲水流觴自不羣
千古遺風誰再繼

謾臨禊帖感斯文

孤燕

畫梁誰爲拭塵埃
春社年年戀主回
寂寞巢居閒自訴

空瞻孤影動餘哀

余有悼亡之戚

憶春

剝蝶殘花深閉門
半瓶濁酒夜來溫
雲山縹緲春何處
惟有黃鸝空斷魂

新篁

解籜青梢立水西
南枝應有鷓鴣啼
參差不類儂心事
搖漾風前也自迷

題畫二首

青山綠樹入煙霞
杖履尋幽未覺賒
村路不知何處去
小橋遙見野人家

溪畔長松已合圍
堂前古柏半依稀
白雲滿屋山無數
日暮遊人帶笑歸

惜梅

風暗雲霾夜雨來
梅花零落半塵埃
上陽人去香魂在
白影離披淚點腮

除夕

那堪又是一年人
擬學桃符冷逼身
分付侍兒翻寶曆

多年老病畏逢春

卧病

獨坐擁裘憔悴容
孤燈憐我鬢鬢鬆
春愁無限低徊處
風雪梅花夜半鐘

故衫

疇昔裁成色尚妍
篋衣更製舊綠遷
自從拂拭酒痕後
久棄塵箱二十年

嘲燕

花謝香殘蝶漸稀
雙雙飛燕入簾幃
夕陽烏巷多荆棘
好向尋常矮屋飛



原件短缺

P12 以後缺

白蠟梅次韻二首

月裏聞香怡我神素心檀辦耐寒身中州移取栽山徑

夢繞鄉園恰小春

素心檀辦河
南十月即開

十月清霜倍有神素娥彷彿是前身幽香早向釵頭度
却笑寒梅冷待春

綠溪草堂桂花

竹西村影漾江流無數鷓盤糲穉秋塵土莫嫌過客少
好花時節結良遊

題二美人觀梅圖

雙雙挽袂上瑤臺蓮步輕盈印綠苔春色撩人呈百媚

放言居詩集卷六

姪孫 錫端菽衣

海上曹炳曾巢南著 孫壻葉 承子敬同較

孫男 錫黼誕文

雜著附

是亦樓收藏目錄序

庚子歲巢南子年已杖鄉老倦閉關長夏多暇手書是
亦樓所藏典籍名蹟古器分為三卷而序之曰古今來
賞鑒家所藏未有不好而聚聚久而不散者也當其國
家無事富貴相承則累世可以自庇及至遭罹變故家

方音居詩集卷六
道式微或零落失散者有之或磨滅於兵燹者有之不
然非毀乎婦人孺子即轉徙乎賈豎流俗之手蕩然無
復存焉此固余向所目睹而心傷者也而世之篤好者
猶將巧偷豪奪私為己有何其惑歟嗚呼余生也晚前
輩搜羅之富不獲見矣時遇所售則厚價而得之什襲
而藏之處抑鬱無聊之際對此可以動蕩心目發摠志
意若深契其中之趣而有不能已者即余亦不自解其
何以然也吾子若孫得我所傳宜博覽精索講論參究
以思勿替即或不然守之有道以望繼起有人如散亂
蟲蠹為人竊奪而不知惜有負於我心多矣或曰好癖

則物聚聚多而物散此理之常今子已見及之則亦聽
諸造物而已况好非田園屋廬之適象犀金玉之貴也
而猶為是沾沾者哉余應之曰歐陽子有言象犀金玉
之聚其能果不散乎余之不能以彼易此猶之歐陽子
也聚雖不若歐陽之多而好更篤於歐陽好之篤竊思
其聚之久非愚也不然田園屋廬不更切乎乃田園屋
廬則聽之而茲則欲其守之亦可以表余之微志矣且
聚而散天也聚而克保其聚人也天不可必而人當知
謹不聽乎天與聽乎天而不盡乎人皆非也雖歐陽復
生豈以余言為謬哉

雲間二韓詩序

雲間二韓詩者莫公子廷韓顧公子仲韓之所作也二公子生明隆萬之世相去百里而近並承藉家世以文學氣誼相高有聲舉場間甚久又並精書法通繪事刻意爲詩歌揮毫落紙流傳遠近目爲二韓以字不以姓異於唐之皮陸錢劉云者旣並不得志於場屋侘傺失職鬱鬱窮愁以死其繪事世罕得見獨莫以父子善書有崇蘭館緼默齋帖之刻顧無傳焉所並存者詩耳則僅掇拾於虞山之選寂寥數篇而已嗚呼二公子時同地同才同不得志亦同其微不同者筆墨或傳或不傳

顧其詩僅傳或不盡傳則又同可悲也已余少時雅慕二公子名與顧又世相好也嘗從其家搜得杜公表度所刻詩二卷暨未刻草本蟲食將半盡乞以歸每以未見莫集爲恨越數年始獲覩所謂石秀齋集者定自吾鄉張長輿先生而莫之外孫潘太學所刻也亟購而藏焉於是二公子之詩復完嘗與兒輩論之廷韓當王李輩狎主齊盟亟相引重規撫盛唐未脫窠臼然其意氣雄豪調高采烈所謂翩翩佳公子者讀其詩猶可想見仲韓爾雅閒適出入中晚未刻諸作轉多清新而杜選顧反不錄蓋風氣爲之累矣吾安知夫石秀齋集之外

不尚有尤美者乎或存或不存則二公子之不得盡同也他日從子一士見之請曰是二集者幸入叔父手忍使終判以虛二韓名余曰然遂命廉兒互相較訂併授開雕莫集一仍其舊顧則益以所未刻倍杜選之三釐為小菴羅集六卷仲韓所自名也既竣合題之曰雲間二韓詩並傳朋好以釋余悲廷韓名是龍後更以字稱雲卿一字後朋別號秋水方伯子良之子華亭人徙家上海仲韓名斗英一字鎮海尚寶應夫之子上海人仲韓子昉之廷韓孫秉清並能詩善書為時所重

袁海叟詩集小引

向愛讀海叟先生詩購得鈔本一帙苦未見其自定原本求之數年始獲我鄉張叔翹先生所重刊四卷計三百八十三首叟之詩於是為備而間有譌字年來參閱諸本俾還舊觀從叟志也前此陸文裕公刻瓦缶集既晦集又前此朱氏刻在野集今皆罕傳獨張本仍叟之舊板已漫滅故余為校定梓之其集外古律詩暨從子諤廷藏題畫絕句共五首別為一冊吉光片羽不忍聽其零落又以誦詩者當考其世哀志傳及昔人評詩語為附錄一卷而虞山小傳尤加綜括故殿於後以備見本末余家所藏自張本外有何氏活字印本林氏重訂

陸本及友人相遺鈔本數帙皆以叟自定本爲原委其
序跋悉載卷首惟在野本別出謹列附錄以存大都

書山中白雲詞後

曩者余友簡兮陸先生相契甚篤朝夕過從討論古今
樂府詩餘必推玉田張叔夏一日出山中白雲詞見示
乃先生手錄批閱者曰世無善本子盍鋟棗以傳余曰
唯唯時猶習舉子業未嘗專讀古書不知叔夏爲何時
人也未幾先生與子原亭相繼謝世欲求所謂玉田詞
者杳不可得間嘗披閱詞選得見數闋覺慷慨灑落於
周待制柳屯田諸名家外別出蹊徑而律呂調諧一一

應聲叶節追憶簡兮之語爲太息自悔者久之去年秋
有客以殘編數種求售翻閱未竟忽睹此卷正疇昔先
生所手編者不禁狂喜亟購得之以付廉兒於是復歎
四十年間人之存亡書之離合莫不有數存乎其間而
白雲一帙若終有待於余也會余刻海叟詩集因將此
編重加叅訂附以樂府指迷名賢詩序贈別之作精書
鏤板以酬宿諾嗟乎聞笛山陽猶深惻愴况我良友手
跡如新余深幸是編之流布而惜先生已不及見矣流
連吟諷重增太息云張叔夏名炎號玉田生又稱樂笑
翁西秦人或云臨安人

書姜白石集後

南宋詞家推白石玉田為領袖而玉田實祖白石所南
鄭氏叙張詞謂其仰扳堯章山村仇氏亦云與白石老
仙相鼓吹而玉田嘗稱白石如野雲孤飛去留無迹不
惟清虛兼又騷雅兩人之詞實屬一家余既刻山中白
雲詞欲併雕堯章先生白石詞以成合璧全詞罕見於
世竹垞朱太史云白石樂府五卷僅存三十餘闋汲古
閣沿花菴本所錄視他選較備亦不過三十四調而已
然則白石詞之佚而不見者多矣小阮諤廷近從其外
家郡城陸氏借得鈔本為前輩錢君介維所藏焦徵君

廣期校閱者計共五十八闋雖非五卷之全較之花菴
汲古竹垞三家之藏則茲本所獲獨多至其詩與雜著
世尤罕傳禦兒呂氏鈔宋詩一代名集大備獨逸白石
藝林以為憾事而茲本有詩二百餘首雜著數種是可
寶也因重加叅校藏之家塾他日倘得五卷之全當合
刻以成完本陸君名祖琳字孝毅別號希菴老人吾郡
博雅士也鈔是集時年七十有一并附誌之

書長嘯道人焚餘漫詠後

昔漢茅君叔申棄世遁跡遊於恒山者幾三十年道成
歸人不覺也父母疑而杖之時弟季偉思和正富貴榮

顯鄉里從而稱慶將之官送行者數百人叔申笑謂衆曰他日送僕當不減目前也越明年別鄉里果見旌旗甲仗白日乘雲冉冉凌空而去然後父母親戚無不仰望驚怖咨嗟歎息始悟其平生非異端之術而深悔前此之疑已無及矣吾弟長嘯道人將有志於是耶我老矣多病日衰方欲驅子姪輩馳逐風塵中以圖進取將謂不如是不可以立身即平日咏歌亦恐有妨舉業引以爲戒何暇及二氏之學哉今讀焚餘詩雖一時託興每多見道語其用意之灑脫氣度之閒遠真泠然迴出於世味之表不啻飲我以清涼散也異日道成棄人世

之榮釋時俗之疑雖追蹤叔申亦何難焉

書武林潘敬亭印譜後

考先秦所定文有八體其四曰摹印書固藝也摹印又書中之一耳然非本乎學問溯其源流則不能工自斯喜以來書日變而摹印獨存歷代諸家體異趣同未嘗不以秦漢爲準至元松雪翁變作秀潤明文三橋宗以名世何雪漁受文氏之傳乃一變而高古有青出於藍之論厥後蘇爾宣馮芝石楊當時朱修能輩各自成家極一時之盛至汪杲叔始集大成是非余一人之私見古今識者之公言也今觀武林潘子敬亭印譜章法高

古而純正刀法渾厚而藏鋒余六十年來所思慕而未
之見者此非深悉其源流而有得於秦漢者歟且吾與
潘子交觀其人清真瀟灑讀其詩古雅純樸豈僅以摹
印一藝名者哉吁此摹印之所以名也

書王貞六印譜後

昔丙申歲王子貞六挾鐵筆來遊寓居城西半載得時
時過從賞玩別後游歷四方不得相見者六年今復渡
浦尋訪故交出亦草堂印譜見示余展卷歎曰我於王
子無間然矣有明一代羣公繼興宗派各異獨汪氏杲
叔推爲集大成究其章法刀法丰姿道勁必師秦漢又
時出新意神變莫測欲從而求繆悠之處無有也今能
溯其淵源窺其堂奧者非王子歟追憶秉燭談心渾如
夢中境矣撫卷反覆彌增眷戀藏者可不寶諸

書潘魯珍蘭亭印譜後

篆刻自唐李陽冰變古法翻新出奇至元趙松雪周伯
琦勝國文博士豐考功輩盡態極妍神乎技矣後有作
者刻意求工莫能超乘里中潘子魯珍年少多藝研精
鐵筆近篆蘭亭序一首融會諸家別開生面於端勁之
中寓疎秀之致經營慘淡具有前輩筆力所謂擬議以
成其變化者耶令元明諸公而在定當把臂入林讓此

君出一頭地也

祠堂祭田記略

往者康熙四十五年丙戌梧岡兄首議建祠以爲尊祖敬宗展親睦族之地乃畫芳園中西北一隅作基址既卜日鳩工復慮物力不繼遷延歲月來謀於余余曰固也當與兄共成之因與大椿姪各出白金五十兩贊襄其事計所需猶缺復出老母遺金百餘以速其成明年丁亥春工竣夏五月奉神位入祠歲祀定於二至凡牲牢酒醴之需一歲計得金三十兩乃可成禮於是梧岡首割產二十畝作祭田爲永久計余與春浦大椿繼之

各捐十畝共計田五十畝皆膏腴之業也議司其出入者僉謂莫如巢南余亦曰是誠在我於是每歲取租以供祭饗完餉修祠之用有餘財則謀生息以豐之置腴田以廣之十五年來收入漸饒產業漸益凡族人助田助價以迄吉事樂輸銀兩悉登於籍一出入錙銖勿漏前後共得上田一百九十四畝有零今刊附譜後使子孫一覽了然不得藏匿倘有欲盜賣更易者通族可鳴鼓而攻也余自念忝爲衆舉司事苟外託公平內懷欺詐則上滅祖宗下辜羣望族之人安賴有余而余亦何面目以對族之人乎顧余老矣所望庶兒承順我志

恪守我法母使日久懈弛弊端潛起則余父子可告無罪於祠爾已徼天之幸俾歲之息者日滋產之置者日廣法范文正公遺規推祭田之餘以調恤族之困乏此余所日夜有志而未逮者也後有賢者主持斯事踵而成之益務光大於前人我曹氏尚永有後於海上哉

是亦樓觀梅記

小堂之西有是亦樓焉余藏書畫圖書之所日嘗吟咏臨摹偃息其中前倚藥欄欄外有蔬圃圃畔栽梅花廿餘株紅白相間四圍桐杉槐柳編籬以護之即米南宮所謂垂蔭一畝真一畝之居也今年春梅花盛開籬外

行人徘徊觀望如雲霞掩映香從中來咸歎羨不置於是採蔬沽酒招良朋登樓把盞非騷人墨客技藝之善且精者不得與焉未幾纖月橫空花影參差益有以助茲樓之清迥諸客避席而起曰今日之叙雖無紅牙按拍翠袖擎杯亦足樂矣可已于詩乎遂各吟一章張君芝田爲寫觀梅圖以記勝事云

題顧氏閣帖二則

顧廷尉汝和玉泓館閣帖十卷從宋搨本重摹勒石者也傳言顧氏在日未嘗輕售於人後來贗本雜出賞鑒者希無由考厥異同是帖乃先人平生真賞也授余收

藏之勿失及長深悔不自秘惜幾為蠹所殘缺年來雅
好臨書雖未窮古人堂奧而探討之下亦頗有得焉每
閒窗展卷便覺神彩煥然凡點畫之結構筆勢之婉雅
叅較勘證果與贗本迥別文壽承云得此則他帖可以
盡廢信不誣矣

晉唐人去今已遠墨蹟在人間者絕少惟石刻可以傳
遠今淳化石刻又亡幸賴顧氏本尚存則古人之蹟庶
於是乎備矣顧聞好事家多藏顧氏閣帖及從借觀盡
出自吳市中木板刻復潦草則顧氏本之不亡者幾希
乃知是本真法帖中珠玉也子孫寶之後有賞鑒家復

起必知我言之非阿所好耳

題膠城張壑年花果卷

我聞桃乃五木之精信為珍果顧度索之三千結實天
台之採噉充飢食之可以長生者桃也味甘而半以分
君計功而相繼自殺食之適以貽羞者亦桃也桃固若
是其殊致乎乃觀齊州蘭若上陳經案則又一空諸相
矣圖中之桃我不知其居何等也還以問之寫生者

題渭清姪孫花卉冊

古人名繪有寫生寫意兩家曾見前人論明季畫格陳
白陽妙而不真陸包山真而不妙兼二者之長惟服卿

一人耳蓋形肖慮掩其天趣疎放恐失其形模俱未得箇中佳境今觀此冊用筆秀潤設色古雅上宗服卿於真妙二境頗覺有合

題陳善菴小照

此心人不得而見也必自反而後見之狀貌已不得而見也必圖畫而後見之裴晉公云一點靈臺丹青莫狀則圖其貌尚未必圖其心然愷之言傳神在阿堵中神可傳心未有不可見者苟圖其貌而不克圖其心猶未得謂之善畫也小園東籬九秋菊放觀者如市有從中攜小像向余索題者余展卷相顧失笑曰此非吾故友

陳子善菴歟不特其貌似其瀟灑坦率之曾襟亦恍見焉余與善菴交三世矣心常無間自善菴客四方壯遊名山大川余以多病杜門無從促膝談心久不相見矣今獲題是卷恍得常見善菴善菴攜此出遊篷窗旅舍一展所題又不啻常見余不相見而常如見余二人之心不俱託是卷以傳乎因喜而識之

自題行樂圖

巢南子行年六十髮白齒落老且病矣未嘗使人寫行樂圖辛丑歲黃子端友為余圖之遂援筆題云體何其瘦材何其劣學不干祿安分守拙客有大言置之鬼說

癯儒杖履太平時節觀瀑松間尋芳巖穴六十年來此
為素業

醉宜亭題辭

頤情閣之西土壤高凸歲久樹茂廉兒壘石構亭於側
請余題額因名曰醉宜即皇甫嵩所謂凡醉有所宜不
可以快樂失時也夫醉花宜晝而襲其光醉雪宜晚而
潔其思醉風雨宜夏而納其涼醉月宜秋而爽其輝醉
適意日神氣凝而宜酬唱醉文人墨客宜談天而逸辯
睹時序之佳景賞人心之樂事陶然一醉於此不亦宜
乎登我亭者毋徒痛飲自豪而失其宜可也

跋鶴巢

雍正九年歲辛亥成儒鄒子築室既成屬余書鶴巢二
字於榜并為作跋語余初聞之未暇析其義姑應之曰
唯繼而思之鶴之為物也孤高冲淡清遠絕俗日則飛
翔於雲表暮則棲息於山林飲啄自如與物無競而且
鸞鳳為侶松石齊壽凡物之品孰能過之詩曰鶴鳴於
九臯聲聞于天其棲止之得宜自有超然於塵埃之外
者鄒子以巢况居夫亦有以鶴自况之意耶世有未識
鄒子者覘此可以知其為人矣爰誌數語以表之

金星槎像贊

桐能覆其陰茶能滌其心菊花傲風霜之交侵詩卷助
白首之清吟先生之樂不在彼而在此問誰知先生之
意深

墨贊

摩頂放踵光揚翰牘爾豈爲利乎知白守黑奉供著述
爾果爲義乎我獨怪汝之親白碧友居默終其身悠然
君子之側天下莫與汝爭黔皙吁異矣

歎硯贊

存爾角體無缺傷取法坤象之能方虛爾腹渙以膏澤
俾托書香之無極

壽巢南曹先生七十詩序

去冬十二月余至上海訪曹封翁巢南先生不獲見令
子敬三舍人置酒家園與余欵洽良久謂余曰老親十
年來不見一客獨雅重君願一相見而卧病不果明年
九月乙卯爲老親七十誕辰敢乞君一詩爲壽今秋七
月翁之從子諤廷孝廉自如臯學舍復致書于余趣余
詩并命爲之序其爲余具道翁行履甚詳曹氏故上海
甲族自明迄本朝代有顯人贈文林郎贛縣知縣滬
城公生子四翁其第三子也少工舉業補郡諸生因病
懶于場屋又素性恬澹深厭時下奔競黃綠陋習入太

學絕意進取勸之仕弗應因自號小隱翁生平豁達大
度不事家人生產性至孝於所居室東設父母遺像朔
望拜瞻祭享必竭誠盡敬凡時物未薦不敢嘗四十餘
年如一日與兄顛縣君梧岡倡建曹氏宗祠唐吏部東
江記之又率子若姪輯族譜具載先世德行文章政績
以示族人詳見張徵君樸村序中他若周卹三黨與爲
德鄉里事不勝書地方當事交重之而足跡不交官府
比巡道朱公一鳳駐節是邦稔翁善行特親造其廬手
書樂善不倦四字顏其堂閭里傳爲盛事然翁自視歆
然謹遣子踵謝卒未嘗一往謁也平日惟肆力詩古文

詞尤精研書法得董華亭神髓文于唐宋八家外喜讀
朱考亭宋金華方正學黃遵巖歸震川及 本朝魏冰
叔侯朝宗汪堯峰諸集嘗云當以此作後八大家家多
藏書搜羅古人書畫名蹟能別其真贗購得古書善本
必勉付剞劂或力有不能則手自鈔寫自奉素儉比以
病戒飲惟日課一詩有放翁風味樸邨嘗序翁之詩謂
翁文與行皆修潔而無瑕疵於乎其知翁深矣敬三才
品卓犖方今 朝廷不次用人輦下知交每趣其赴京
授官輒以親老多病爲辭而文采風流與翁後先輝映
翁向以一子不早得孫爲憂今且連舉兩孫瑤環瑜珥

稱其家兒翁顧之喜可知已園有亭有閣竹木蒼翳百
卉紛敷方菊花時介七十觴敬三與謬廷交遊滿天下
凡諸名流稱壽之辭何可勝數余特賦一詩倡之而并
為序之如此

我生六十餘或可如翁壽自顧不如翁如翁世希有身
不嬰世網跡不染塵垢以子得受封猶然一野叟家有
五畝園疊石作培塿衆木羅其前羣葩繞其後圖書並
彛鼎晨夕相左右問翁樂何如賦詩盈萬首會當介壽
時飲我黃花酒

雍正己酉秋九月雲川弟杜詔拜藁

祭巢南曹先生文

嗚呼賦就玉樓俄奪修文之駕星歸箕尾咸傷降嶽之
英遺範猶存老成長謝是以製陶潛之誄撫椒桂而咨
嗟銘郭泰之碑望山淵而於邑原夫七步華宗九峯甲
族風高懷葛傳獨行於還金術託軒岐著奇功於剗背
已羨門崇駟馬奕奕金貂更看庭植三槐枝枝玉樹先
生蜚聲黌序振采詞場八斗才雄散作行間珠玉五車
學富書來紙上雲煙題箋妙鬪韻之詩風迴雪舞蘸筆
作擘窠之字虎跳龍拏閒情蕪叔夜之揮弦綜覽擅茂
先之博物方擬紫霄騰躍展蘊抱以作雨霖庶幾絳闕

委蛇播經綸而垂星日乃邱壑之情甚切肯隨南溟鯤
鵬雖風雲之遇可期徑伴北山猿鶴至若性成孝悌誼
重睦婣攀翠柏於秋風神傷鬪蟻對名花於月夕色養
慈烏讓棗推梨友于足式指困分宅施及靡涯撥祭產
以祀先人立義田以贍族衆而且存心濟物加意扶危
或除道或成梁義無不舉或助喪或歸券善曷勝書誠
爲當代之全人一鄉之重望也爾乃過庭有訓令嗣維
賢名列右曹光暎紫垣之宿位崇西掖職司文誥之班
家居而侍養堂前彩戲而承歡膝下時則 龍章煥爛
歸本所生遂爾鳩杖婆娑克昌厥後方謂齒逾四豆將

載渭水之車不意病迫三秋已致殷楹之兆余謬分憲
節久識黃陂幸駐禮鄉未親紫宇忽覩訃音之至遽驚
耆碩之亡嗟乎高山已寂思仰止以何由流水無聲欲
溯洄而奚自悼人琴之永逝藉絮酒以自將縱使懿德
長垂無奈靈光莫仰悲風四起城笳雜寒雁齊哀孝水
一枯烏鳥共啼猿欲絕此日鸞驟竟去應在瑤天何時
鶴化重來合歸華表尚饗

睢陽王澄慧頓首

身無恙奉靈光莫作悲風四時
賦賦蘇蘇寒郵齊齊京京
臘臘而吳自朝入琴之永逝
蕭蕭而自歸歸對對蘇蘇
昔昔之山望平高山子窈思
以以何由然水無聲聲
唯唯人語音則幸無斷未
縣縣於宅忽賻信音之至
驚驚燭燭水之車不意
詠詠與三妹子姪甥
之兆余皆余

勅封徵仕郎內閣中書舍人國學生巢南府君墓誌銘
歲癸丑得巢南叔父之訃設位以哭明年弟培廉以葬
期告且屬予誌予何敢辭顧念叔父之所以視士與士
之所以獲教於叔父者有越常分欲請假歸親拜而後
誌之嗣遷御史仲秋遭

憲皇帝宴駕

今上登極更歷諸鉅典茲又濫轉諫垣 恩遇優渥不
敢復萌請假之想乃舉向所親炙及邇年之得於南來
親友者而著之篇維我曹氏出自宋濟陽武惠王南渡
時子姓散處吳越代有顯者至我六世祖孟春公始居

海上五世祖守愚公精岐黃有隱德載在通志高祖起
潛公官醫院鄉人舉祀賢祠是生贈文林郎遂安縣知
縣南叟公於公為祖南叟公季子為滬城公以梧岡先
生官贛縣贈文林郎配山太君封孺人生四子公於次
為叔公名炳曾字為章號巢南性介而和尤篤至行推
以第施為善若不及而惴惴焉惟恐人知滬城公早卒
主奉宗子公畫像以奉儼若生時時食不薦不敢嘗兄
弟奉養山太孺人唯謹而山太孺人樂居公家竟終公
第兄弟衡宇相望雖析處若同居僮僕皆不知有爾我
方山太孺人歿時伯兄早卒仲兄遠宦公哀毀之餘襄

事盡禮既合葬治墓無懈時有以近墓田要重價者公
必竭力以應不諉弟姪伯兄既卒公綜其家事弟培年
至今曰吾之得保家維叔父力春浦公歿公為營其窀
窆有子先喪無子而家落公嗣以次孫而經理其家其
天性敦篤類如此高曾墳塋丙舍二百餘年矣而公葺
之若新梧岡公倡修宗祠公襄成之復割腴田以修祀
事故唐考功實君為之記曰梧岡倡其始巢南綜其成
厥功尤鉅麓蒿先生公從兄也少受業焉公年已七十
餘猶執弟子禮甚恭見者以為難族之婚嫁喪葬無力
者母族妻族及姻友之貧者皆資於公族姪某年四十

未婚公兩為娶妻繼妻生子而又死給錢養其孩尋父子俱死復為棺殮族叔某貸貲以居為償其子孫復售他姓公還其券而取其什一曰成汝先志也不則盡貸汝矣故人三喪未舉公助之舉張翁顧翁名家子也以淪落為人厭棄公解衣推食三十年歿則殮而祭之哭且慟既捐資建堂育嬰夏月復施帷帳尤喜集良方製藥治奇病輒效他若賑荒疫修橋梁平徑路不可勝紀巡使朱公一鳳欲舉有德以風世親造其廬書樂善不倦四字以贈公獨皇然晚年創置義田以贍族時例得旌邑令于公欲為公請公力辭人益以重公之有德而

弗居也公少為諸生工制舉以肺疾絕意進取宅西有園弟培廉又辟之公聚圖書萬卷與二三知己謳吟嘯詠其中間嘗集戚友羣從拈題課義商確得失以相勸勉平生對子弟極莊而談詩論文不禁喜動眉宇公於書無不窺尤深於詩上宗東坡旁叅范陸同里自朱司李拜石張孝廉西邨以下稱能詩家莫不折服所著有放言居集嘗引一士為知詩談輒移時士之所以得窺於詩沐浴於吾叔者實深也書法思翁晚尤喜作擘窠大字善論六法極賞從兄培源筆墨謂神似其外舅麓臺司農家多藏書樂訂正前人名集刻有張玉田趙松

雪倪雲林表海叟莫廷韓顧仲韓莫葭士顧彥初諸集
人咸稱其表揚功多嘗欲與士商輯朱考亭宋金華方
正學黃遵巖歸震川合之 本朝魏冰叔侯朝宗汪堯
峰爲八大家以士官京師未獲就嗚呼今不可得也已
公以順治庚子九月十三日生以雍正癸丑十月初十
日卒壽七十二歲國學生以弟培廉授中書

勅封徵仕郎內閣中書舍人配徐孺人明相國文定公
曾孫庠生亦臨公女贈孺人繼配張孺人明天啓丁卯
舉人江陰教諭伯潤公孫庠生慎旃公女封太孺人先
公十二年卒克相公德事詳士所撰行狀子一培廉張

孺人出授徵仕郎內閣中書舍人娶劉氏康熙庚午舉
人長洲教諭固齋公女封孺人孫三錫黼錫輿錫辰錫
輿嗣春浦公子培鯉孫女一即撫士長女也適葉承雍
正丁未進士康熙甲午舉人蘆邨公子銘曰

維我先世世有隱德維我叔父克衍先澤維仁爲人人
生自親親親之篤以及弟昆以睦以姍以浹羣倫善隨
時施事垂永利維彼義田文正是繼德盛弗居德是以
粹旣積而充肆外閔中英華所發元氣冲融德餘於社
弗屑祿仕保此天和以貽孫子

從子一士百拜撰

巢南公物外逍遙怡情適志不事聲聞而獨萃精於詩
可以見公之品之高也公為詩嘗數改閱時又改顧不
求其工求其老不求其悅人求其自適又可以見公之
詩之品之高也吾鄉南浦焦徵君之言曰庾開府之文
豈得加於任彥昇美妙太過便是不如知此說者可與
讀公詩矣公好以其德及人尤篤於本支建宗祠倡立
義田利垂永久家多藏書流覽不輟好求人間罕見之
書而讀之且梓以行世又殆所謂平生大有事在不獨
以詩見者公之學問行事已表於巡使勒於誌石見於
諸公哀誄贈言可以備史官採擇而詩集以淞濱外舅

相繼歿猶未梓戊辰夏誕文亟屬余校訂而梓之於是而公之詩以傳且附墓誌哀誄贈言於後而公之學問行事傳更著語云祖宗有美而不知不智知而不傳不仁誕文之爲是刻也可謂仁且智矣公之志與外舅之志均可以慰放言居者公起居所也余婦爲公撫孫女因時得入馬院小而窗明細帙彙尊瑩然環几古鼎噴香餅插名花數枝淨無纖塵彷彿韋左司倪高士風流亦可想風人之致公詩不一種今概曰放言居志所居也孫壻葉承謹書

先王父少耽吟詠中年以家事付先君日與二三知己賦詩爲樂人咸謂先王父之得專於詩可以瞻先君之善養志焉少作曰碧鮮齋稿後曰放言居詩曾手自刪訂倩練川張樸村徵君爲序晚又有續稿王父歿先君取正續稿合爲一帙將以付梓而先君猝病卒矣黼生也晚先君又棄之早每讀王父詩輒痛已不能如先君之善事王父並不獲如先君之長事王父其敢不畢先君未畢之志乃與松亭姊丈晨夕校對從正續稿中梓其尤者以問世又加碧鮮稿數首雜著幾種釐爲六卷先王父性疎曠詩亦如之論

詩以骨氣為先不屑為穠纖綺麗之習初得詩法於
朱拜石司李後麓蒿伯祖從江右歸討論詩學源流
日與諸名士相贈答詩名隆起顧小厓侍講尤以親
串稱文字篤契有唱和詩一冊侍講攜入內廷曾
邀世宗御覽亦騷壇之奇遇云先君承庭訓雅工
詩以上事王父下撫黼等不能多作有漫遊草已散
佚今就所存者分附於王父作後用是益悲余獲事
之日少也孫男錫黼百拜謹識

